





燕市集序

東海朱察卿撰

燕市黃沙搏人面厲風剝骨青繩矢日可積十石市中揖讓之夫率緣寒燠而高卑大苦人好游者何取於燕市以士抱異才者無所售必欲於燕市市耳王先生腹不便而儲侍古今書甚富出爲文章若鎔首山若耶之金而鑄大鼎鬻尊陽劍獨得其黃冶鑪錘變化之秘流彩發艷耀宗廟而照區宇盲者皆知爲至寶一時海內綴文之士輩爲成都相如而許其節槩過之其





才當售故燕市有王先生跡也當是時諸相君  
與列侯家競辟天下士爲記室而雕虫斥鷃群  
然奔轅矣王先生才固異氣貌大人僅見知於  
汝南袁公袁公亦不能爲王先生輕重及再遊  
燕市而求似袁公者亦無矣予常恠漢景武間  
周亞夫衛綰竇嬰諸人爲相頗立名稱不能薦  
一相如要知其所推轂者必附巴士耳今王先  
生走燕市無所遇而遇者皆非王先生才又何  
怪相如之乂困成都也嗟乎袁公死矣王先生  
又未嘗因袁公貴乃今數數稱袁公門人彼群

然奔轅而被引重者不敢自名某氏客昔何取  
於客哉朱在明能詩而好爲奇節故名其集而  
刻之感王先生之無所遭也予多在明感因屬  
序而論次如是惜予倦遊不能從燕市尋酒人  
故地變聲歌王先生詩發其慷慨不平氣於千  
載下也



燕市集序

歲甲子穉登北游太學故相國袁公得其詩讀之喜趣召爲記室是時

世皇帝在西齋宮索應制文甚亟袁公以屬

穉登穉登漫不省時時代草一二悉盪跌不稱旨罷去穉登自慚不能見所長無可爲幸袁公者而公意益不衰召令爲詩亟稱善每對客諷其詩使有聞於公卿間凡所爲穉登者甚力穉登由是感袁公未幾穉登以哀歸袁公亦去館舍丁卯歲穉登復來京師故所嘗爲袁公客



者諭穉登稍自諱母得言袁公門人穉登謝曰  
主臣有之庶幾馮驩任安知我哉乃掇拾兩歲  
間詩若文釐爲二卷度之齋頭酒酣耳熱烏烏  
讀之如馬策扣西州門時也鴻臚朱君在明樂  
義尚文爰命登梓更名曰燕市集云夫燕市正  
今京師地昔之人築臺買駿而捐千金者也  
穉登其何有焉雖然不敢忘袁公遂附麗其事  
如此太原王穉登序

燕市集目錄

卷上

五言古詩

送華存叔鴻臚南還二首

七言古詩

端午日臥病簡范員外

五言律詩

初直史館

送須生之官萊州

秦侍御問病

甲子



謝趙黃門時章饋藥

長安雨望呈袁相公

贈賈御藥

謝汝南公惠名酒

新秋飲顧汝所齋中夜歸作二首

長安移居吳水部載酒憫勞因病謝免

七言律詩

初至京師

玉河橋白燕

袁相公問試餅中紫牡丹詩

余王二太史見過

奉答汝南公

題顧光祿廳壁

送吳幼貞拜官歸江南二首

雨中寄顧汝和舍人

病中簡文丈壽承

臥病見新月簡歐楨伯

西苑荷花

燕山買宅簡范于公貞外

奉謝徐相公問病

送許叅軍出塞



答袁相公問病二首

五言絕句

夜簡吳水部武卿借書

病久

秦侍御來問疾悞入隣家戲投一絕

序

送鴻臚丞吳君還毘陵序

墓碣

顧姬王麗人墓碣

卷下

丁卯

五言古詩

贈翟丈四首

贈曾慶兆文學二首

志哀寄吳氏二首

冬日與諸君子同遊摩訶菴

七言古詩

贈張山人

朱少傅綠蔭亭醉中歌

碧雲寺月出贈朱十六短歌

五言律詩



送孫明府之崇明

送王和仲歸吳門二首

駕幸太學恭述

摩訶菴

宿圓通寺

碧雲寺

弘教寺

臥佛寺

掌羅樹

萬安山老僧

金山寺讀故人黎司馬碑文  
欲遊西山少傅朱公招不赴  
賣宅別范于公

冬日同朱金吾遊少傅公園亭

小至日與諸君白塔寺沐浴

答項豹章

下第後與顧君錫重遊碧雲寺

碧雲寺奉懷少傅朱公

圓靜寺

妙應寺老僧



長安官舍訪陸尚寶子傳

冬夜同陳秀才雙塔寺門步月

陳黃門初拜太常席上有贈

迎春日集華光祿齋中

除夜朱鴻臚宅守歲呈銀臺姜公

元日都門看早朝四首

人日集陸尚寶朝房

穀日寄黎惟敬司馬

十三日看燈市

十四夜燈燕贈李娥

十五夜余王二太史席上贈郭吏部

十六夜朱在明席上贈包上林

送丘明府還蜀中

送陸明府之宜春

席上聽王職方談永嘉山水

七言律詩

送王元美伯仲南還

中秋夜出試院對月作

將遊西山范祠部檄告諸僧

碧雲寺泉上酌酒與朱十六



嘲友人遊山先歸

翠巖寺繙經僧

山中夜宿奉懷宗伯林公

碧雲寺遲華存叔鴻臚不至

湖上

入城戲簡范祠部

山行承御史大夫王公見訪不值

下第書懷呈納言姜公

送莫觀察之秦中

聞警

出塞

贈徐舍人

得張將軍書

寄徐文常父

寄黃丈一之

至口懷諸太史陪祀南郊

寄蔣長康

袁相國故居訪李孝甫太僕

贈臨淮李公子

思歸寄皇甫司勳



玉皇閣對雪懷黃丈淳父

長安立春日

除夕贈歌者

贈翟德甫

謝朱上公贈燈

正月十六夜長安步月簡朱少傅

送盧太守罷官歸楚

寄歐楨伯博士

寄黃吉甫秀才

贈吳京兆

清明日韋莊送朱在問南歸  
送吳中丞之金陵

五言絕句

碧雲寺金魚

七言絕句

弘教寺三首

望湖亭

長至後僧家看菊

訪董述夫不遇

長安春雪曲五首



題董生春山障子贈朱金吾

都下寒食

送余君房下第還四明四首

送陸承道之南都御史府叅軍三首

傳

太醫令支君傳

序

贈吳大夫序

送行太僕主簿徐君之甘肅序

壙志

朱氏殤女壙志

誄

大中丞瑯琊王公誄 并序

書

與王元美伯仲書

燕市集目錄終

燕市集目錄



燕市集卷上

五言古詩

送華存叔鴻臚南還二首

棄繻辭皇京結綬返家林不惜與子別所惜無  
知心自從入燕都不復調鳴琴今日爲君彈冷  
泠舊時音淒清猿鶴怨窅窕山水深駢駢星輶  
車悠悠歷遙岑幽禽無惡韻疎木有嘉陰夏雲  
隨征蓋河柳拂衣襟還家過里門冠首插華簪  
萱草可忘憂爲壽千黃金翹首以相思毋令雙

甲子  
原玉  
登撰



鯉沉

帝城何逶迤巖巖鳳凰樓金鑿圖白虎玉闕雕  
蒼虬鼓鐘發晨光車馬若雲浮森森青瑣班鸞  
鷺以爲儔鏘鏘漢鴻臚鳴佩肅王侯之子結新  
章傾蓋多名流風標暘清鮮令聞鬱嘉休云胡  
懷故墟躍馬歸滄洲聞君有美宅映壑復臨丘  
優游信適志豈不憶宸旒

七言古詩

端午日臥病簡范貞外

長安端午日臥病復思鄉十日不登丞相閣孤

眠却憶尚書郎郎官亦是江南客蕭散情神能  
落鳧著書屋裏不梳頭墜馬花間幾破額與君  
同病戀家園聞說江南卽斷魂官舍三間隔楊  
柳不得共倒菖蒲樽江南此時何所有山市漁  
郎誇石首銀冰滴水盡承鱗木槿開花齊貫口  
僮奴爭買不論錢一尺銀盤瑋瑁筵榴花選取  
雲鬟插艾葉邀將玉腕傳今朝流落薊門西可  
憐寂寂又淒淒兩行踈樹風中綠半日殘鶯雨  
裏啼看君意氣何落落感君交情重然諾詩思  
清如隴頭水瘦軀輕似華亭鶴前日題詩贈病



夫盤中亂走明月珠却疾勝添長命縷辟邪勝  
佩五兵符夕陽騎馬能相訪豈惜床頭濁酒壺  
五言律詩

初直史館

閉門春樹綠丞相辟書來列館周王籍諸生魯  
國才經將魚字校觀以虎名開深愧文章薄無  
由答上台

送須生之官萊州

年少走風塵青袍喜在身一官接海市數口逐  
齊人山與蓬萊近城將不夜鄰之杲碑尚在搨

取寄情親

秦侍御問病

使星來客舍枕上亦相迎無復凌雲氣空餘作  
賦名霜隨皂蓋入花傍繡衣生不敢言身屈因  
君執法平

謝趙黃門時章饋藥

病暍臥京洛悠悠思故園種蓮無白社饋藥有  
黃門琥珀調心氣丹砂清夢寃正逢金盡日未  
可說酬恩

長安雨望呈袁相公



涼雨洗高木蕭然愜病襟故鄉流水路游子白  
雲心花柳秦中暗風煙隴上陰不緣丞相客安  
得近商霖

贈賈御藥

君學太倉公還將妙術同馬鞍丹井畔官署杏  
花中方以千金得醫兼六籍通不知司馬渴可  
有藥能攻

謝汝南公惠名酒

黃閣憐消渴銀罌夜扣關醇合上相德醉易病  
人顏散髮明河下匡床高柳間醒來思碧澗一

欲漱潺湲

新秋飲顧汝所齋中夜歸作二首

對酒不能歸歸來玉漏稀星辰垂馬首河漢上  
人衣彈鋏功名困吹竽意氣微見君如海鳥終  
日可忘機

青槐樹樹烟客舍苑墻邊羸馬飲秋雨短衣行  
暮天芙蓉思故國蟋蟀感流年何事長相見歸  
來又惘然

長安移居吳水部載酒憫勞因病謝免  
載酒憫羈人題書謝所親不知鄉夢遠但愛客



居新帝里移孤劍天涯問四隣且留桑落味稍待病餘身

七言律詩

初至京師

小店臨街馬蹇停五雲宮闕路初經日當帝座偏增麗天到神京別是青吳客脫裝看寶劍燕姬壓酒出銀餅頽然且作家山夢長樂鐘聲未慣聽

玉河橋白燕

玉燕金溝曉日輝波光禽影故霏微相呼未改

呢喃語乍見還驚縞素衣珠箔堪藏迷不出  
釵初化去忘歸水精宮殿梨花樹任爾高高下  
下飛

袁相公閣試餅中紫牡丹詩

名花開近掖垣邊一朶風吹映日鮮色借相君  
衣上紫香分太極殿中煙杯含仙艷春爲酒翰  
染天葩錦作篇何幸書生叨共賞不才深愧沐  
恩偏

余王二太史見過

燕山日日歎離居燕草青青滿敞廬楊柳橋邊



妨貫酒鳳凰樓下廢傭書高軒並過聞簷鵲嘉  
客難留愧釜魚欲賦上林吾豈敢只餘多病似  
相如

奉答汝南公

平津閣上夜題詩繡牘親裁與項斯字比宮雲  
俱五色情將禁柳共千絲袖中携處香偏入馬  
上看時月故隨自是陽春元寡和莫言寒屋報  
書遲

題顧光祿廳壁

入門脫幘共酣呼官舍風清似玉壺芍藥調羹

尚方饌蔗漿消熟大官厨馬蹄無事看山色花  
影多情戀酒壚綠鬢仙郎正年少肯同張翰便  
思鱸

送吳幼貞拜官歸江南二首

同行羨爾早爲官乘傳匆匆惜別難日裏龍  
顏才近侍天涯鶴髮且承懽叔孫書當朝儀讀  
萊子衣將晝錦看歸去莫言司馬病煩君只與  
報平安

捲書裝劔說歸期我病君行酒一卮魏闕芙蓉  
圖作障漢京楊柳折無絲白雲歸去應須早青



瑣重來未是遲。與報故人無可贈，只須君口寄相思。

雨中寄顧汝和舍人

花間小雨濕衣輕，夜半思君隔鳳城。尚食宮監邀翰墨，射聲校尉識書名。齋廬西畔濡毫待，香案前頭捧硯行。漢武若言封禪事，茂陵今已著書成。

病中簡文丈壽承

竹門無客不曾關，黃鳥多情去復還。疾是烟霞難服藥，性同麋鹿合居山。盤中首蓿官如水，屋

裏蓬蒿鬢漸斑。歸去虎丘雲滿寺，與君箕踞弄潺湲。

臥病見新月簡歐楨伯

憐君高枕正思鄉，余亦兼旬對藥囊。渴遠荔枝安得解，憂深萱草可能忘。櫺衡不復題鸚鵡，司馬從教典鷓鴣。惆悵同心却同病，相思簾外月如霜。

西苑荷花

苑內香風苑外聞，龍舟來去錦紛紛。葉承仙掌盤中露，花散蓬萊殿裏雲。天仗爭妍齊爛熳，爐



烟歛馥避氤氲三千宮女情相似處處凝粧待  
聖君

燕山買宅簡范于公員外

卜居燕市屋三間揚子爲隣意共閒雲氣無心  
上廳事馬蹄終日過柴關雨中欲補門前柳窓  
裏難添枕上山從此不嫌來往數問奇多在月  
中還

奉謝徐相公問病

自有陽春到客居不須深歎食無魚詩從紫禁  
知名重病是黃扉問日除野鳥齊歌忘服藥庭

花盡笑罷看書何因一借吹噓力得似當年  
子虛

送許參軍出塞

長城上谷近居庸吹角鳴笳日禦戎 詔賜黃  
金過塞北身持寶劍入雲中三軍戰罷無秋草  
七月邊寒有朔風歸去尚書問麾下偏裨若個  
是英雄

答袁相公問病二首

斜風斜雨竹房寒雲裏蓬萊枕上看愁過一春  
容鬢改吟成五字帶圍寬書生薄命元同妾丞



相憐才不論官泣向青天懷烈士古來惟有報  
恩難

形骸土木佛燈前黃閣情深有夢牽喘似吳牛  
初見月瘦如遼鶴不冲天詩題半作逃禪偈酒  
價都爲買藥錢知己未酬徒骨立一生孤負佩  
龍泉

五言絕句

夜簡吳水部武卿借書

水曹書萬軸一半讀將殘借就明河色無須鑿  
壁看

病久

病久炊烟斷朝糜質黑裘見人防忌諱不敢說  
窮愁

秦侍御來問疾悞入隣家戲投一絕

聞道乘驄出何曾到客居隣人亦消渴錯認馬  
相如

序

送鴻臚丞吳君還毘陵序

皇帝陛下臨御四十三載大司徒上封事奏近  
歲北虜犯邊飲馬長城下發六郡良家三輔弛



刑徒擊虜虜遂宵遁惟是士馬芻餉費無筭奏  
上

陛下詔問司徒實塞長久計司徒對 上募民  
輸粟拜官如漢孝武皇帝時故事

陛下制曰可於是臣鳴謙首應 制助邊得拜  
鴻臚丞鳴謙君姓吳字幼貞毘陵人太僕先生  
之愛子也

陛下初蒞極太僕先生官御史建議開通惠河  
便國漕歲省太倉銀二十萬 詔以其奏書付  
國史傳示永永蓋至於今先生雖老在林谷而

玉殿之上茅屋之下皆知有吳太僕云先是今  
年春余以太學生與幼貞同來京師比至又同  
邸舍則有騎馬執鞭之客來相慰勞見幼貞年  
少韶秀輒相問嘖嘖曰是昔嘗開通惠河御史  
吳公之子也而幼貞遂得以父太僕公故遨遊  
諸公卿間方其輸粟時其平日所交游諸公卿  
凡知太僕先生者又俱交口爲幼貞惜謂國家  
重制科官人而鬻爵非太平美事幼貞不當應  
是 詔余少讀漢代典紀卽慕河南卜式與蜀  
司馬相如二人並古賢豪之士而皆以傾家財



爲官今卜式故漢名臣而馬卿辭賦有凌雲之  
氣千載而後讀其書無不吐舌相下也是輸粟  
之事不足爲卜式司馬相如二人病而二人之  
名反得有所托以顯當時而垂後世由此言之  
賢不賢在人不在官與制科否也鴻臚固秦漢  
典客之官在朝廷爲近侍其職雖不爲大臣而  
得以贊大臣朝儀與齊其參差不肅敬者余頃  
有事早過青瑣門下晨光初發鼓鐘互動見中  
外大小臣工朱衣鳴玉鸛鷺爲行而九夷八蠻  
卉服雕題左衽侏離之人亦皆鬱鬱森森各率

其職以入對於闕庭凡跪拜起伏之禮一惟鴻  
臚是聽惴惴惟命不敢後先余以是始知鴻臚  
貴而羨幼貞拜爵之事爲榮幼貞年甚富歸家  
讀古人書與其賢父兄上下議論日緝而月熙  
之他日立朝爲卜式司馬相如不難若自多其  
官無所事事以古人爲不足企慕則非所望於  
幼貞幼貞伯仲並以兄弟視余而余受知於太  
僕先生甚深有國士之遇故遂不忌諱進其謬  
諤之論幼貞行矣能以余言爲然便當佩長劔  
與君忼慨揖於都門安用執袂依依雪涕數行



學兒女子輩爲也

墓碣

顧姬王麗人墓碣

往閱古今圖籍志見所載美婦人傳蓋有其目而亡其書意遂欲足成之於是稽竹帛之未盡訪蠹魚之所遺見古所謂美婦人者莫不眉如青山面若丹萼娟麗則天帝爲稱清揚則山河作類美哉其顏色之極乎然考其盛衰往往淪落以死其有天幸能善始終者十靡一二於是乎傷紅粉之無命而痛佳人之不遭也比來燕

山邂逅顧君汝所出其姬王麗人墓志讀之凄然感余心焉嗟乎妾之薄命從古爲然匪自今矣按志麗人王姓名某某郡人本良家子凡兩嫁爲楊氏張氏婦二姓並狹邪倡家麗人以故失身爲倡倡不幸非其志也青蓮鄂鄂出於淤泥靈芝煌煌生彼糞壤豈不惜乎當其時風生北里車馬如星雲暗東門笙歌沸地五陵七貴之子傾白璧而圖歡奉黃金而爲壽者鴈行屋裏魚貫門前然而桃花無語心不在乎路傍柳色含顰絲願垂於墻裏時惟顧君恂恂經生韶



年奇偉鸚鵡傾座鳳雛照人麗人一見目成終  
天心矢驕靡爛熳之夫薰轅銜鬻之子投珠請  
佩爭爲後先而麗人之心石如也綠綺成奏而  
宵窕輸心紅拂流眄而英雄生氣余以是有感  
乎麗人不在區區粉墨間矣未幾東夷竊發南  
土沸騰麗人自顧光艷懼落賊鋒乃毀容魚服  
竄伏田間以免陳妻分鑑身獨避乎越公柳媛  
閉門節不墮於叱利有美英英皎然完璧矣後  
一年始歸顧君落籍從夫益脩婦軌易筮篋以  
刀尺去珠翠爲辟纊居卑有却輦之義妙解有

說詩之辨閑家有絡秀之智相主有李娃之節  
內外喑喑岐口稱賢明月不圓奇花易落曾不  
幾何病瘵京師以死年纔二十有三嗚呼天矣  
寶釵墜而飛燕亡青銅缺而盤龍隱嗟嗟夫君  
聽猿叫而論腸指鶻啼而喻血傾城之痛何時  
釋也及是顧君拜官光祿卜以某年月日葬麗  
人於某原買土而瘞雲鬟種樹而封玉骨悲夫  
悲夫顧君以僕負雕龍之望擅泣珠之技空山  
片石倩僕爲文嗚呼楚峽白雲作賦何慚於宋  
玉曹江黃綯題碑不讓乎邛邛後世緝柳編蒲



之士想燕子而名樓惜鶯聲而立傳茲墓也豈  
但樵蘇不及抑亦金石長存云耳

隆慶庚午三月

靖江縣朱宅快閣雕本

燕市集卷上

燕市集卷下

丁邠

太原王穉登撰

五言古詩

贈翟丈四首

翟公方得意結客何紛紛冠蓋填巷中一一皆  
青雲芳蘭雖被鋤未嘗易清芬胡爲平生交落  
落不相聞門外寡轍迹暮雀空成羣昔亦一翟  
公今亦一翟公世情如浮雲朝異夕不同路傍  
桃與李芳菲競春風不如南山栢青青歲寒中  
英雄不可測屈伸隨其時以彼英雄人亦俟英



雄知白龍爲魚服羣魚反見嗤君昔處東海浮  
沉人不言翩翩遊 帝京賓從多華軒五侯奉  
下風七貴皆掃門黃金白玉璧贈者不爲恩璧  
以前爲壽金以置酒樽

君懷一片心皎如春江月推心置人腹安得有  
胡越雙鐔雌雄龍報恩未出匣季布誠小諾朱  
家非大俠我昔遊燕山丞相禮爲賓世皆重丞  
相非重幕中人今來丞相亡相弃如飄塵惟君  
重意氣不改平生親悠悠世上交焉知雷與陳  
長安多青樓月出吹笙竽上有倡家婦下有酒

家胡十五十六人雙雙笑當壚齊姬善擊鞠燕  
姬善擣蒲左挾外黃女右擁邯鄲姝美玉不爲  
白胭脂不爲朱天然芙蓉花顏色與世殊與君  
各青鬢及時爲歡娛安能局促行學彼轅下駒

贈曾慶兆文學二首

薰蕕不共器冰炭不同壚白沙投泥中皎皎不  
受汚王者豈不作清朝多詭儒心爲含沙魃舌  
上爲唐虞羣犬吠其形千百以爲徒轉丸哀甕  
餒甘帶耻鯽蛆惟君秉高尚耿耿潔其軀勿爲  
蕭艾榮寧作芳蘭枯



松蘿非一木纏綿枝與葉膠漆非一物其性乃  
固結氣味苟無間安問秦與越君家楚雲夢我  
家吳滄洲相去數千里邈馬風馬牛一朝燕市  
傍邂逅心相投同上蘇秦書忤時不見收君有  
青驪駒我有黑貂裘持之贈酒人五斗結綢繆  
知心傾蓋間奚必在白頭

志哀寄吳氏二首

翩翩枝間雀譙譙委道傍上爲鴝鵒啄下爲螻  
蟻傷仁者過其側拾之歸青箱飼以黃金花五  
內皆馨香瘡痍日以平羽毛日以長朝棲主人  
門夕宿主人堂此雀銜玉環將以報主人一朝  
嬰世難主人歸黃塵徘徊空庭間肝腸多苦辛  
擾擾行路子此情安可陳

鷹鷂擊衆鳥衆鳥無能爲胡然墜蓬藿自捐風  
雲姿雖稱六羽翮零落何所施螽蟴小有毒螫  
人人不知昔爲衆鳥畏今爲衆鳥欺旣言覆其  
巢又已攫其兒覆巢猶且可攫子當如何哀哀  
三黃口泣血紛滂沱好生上帝德無乃傷天和  
誰爲扣九闔三面去網羅

冬日與諸君子同遊摩訶菴



帝京多黃塵白日寒霏霏  
竭來江南客中宵懷  
翠微招我良友生同心  
幸無違出遊城西門太  
行何崔嵬佛居黃金宮  
珠冠紅罽衣身毒青琅  
玕雕鏤以爲扉其徒四  
五人松間悉皈依是時  
長至後慧日增微輝白  
雲窓中生花雨階前飛  
同行數君子其一乃先  
歸歸者不可留留者暫  
忘機何不結茅屋終採  
西山薇

七言古詩

贈張山人

張生揖我長安市行李蕭蕭橐中水爲貂半敝

蘇秦裘化鳧不成東郭履自言家住越江邊來  
往燕山已十年魚服白龍甘晦迹隨身但有馬  
蹄篇

朱少傅綠蔭亭醉中歌

長安城東太傅家亭前槐樹似青霞鴛鴦瓦上  
枝初出翡翠窓中影乍遮聞道先王舊時宅大  
樹西臨洛陽陌花發垂簷檠戟香葉齊穿戶衣  
裳碧自從獻入

蓬萊殿秋雨秋風鎖空院雲裏朱門不復開人  
間黃髮猶曾見君侯種樹比前人葉葉枝枝雨



露新王家本自多喬木。天子由來重世臣。風  
流蘊藉兼文武。却笑藍田惟射虎。功名不獨上  
麒麟。辭賦還能擅鸚鵡。圖書多似蔡中郎。金石  
丹青數十床。于闐琅玕裝作軸。蠶叢錦綺翦爲  
箱。虛亭如在山深處。黃鶯紫燕俱無語。屏間瀑  
布夜長鳴。壁上寒雲飛不去。何人能薦馬相如。  
何處能容奏子虛。惟君題我門前鳳。惟君問我  
釜中魚。意氣蕭蕭一儒者。憐才未肯輕山野。投  
壺不讓祭遵多。飲酒豈居羊祜下。大宛名馬桃  
花毛。亭上天寒看寶刀。酒醒一枕南柯夢。騎出

燕山月正高

碧雲寺月出贈朱十六短歌

燕山一片月。夜照白蓮花。千里萬里同爲客。三  
人五人齊憶家。與君俱是悠悠者。意氣相逢不  
相下。平原俠士能關鷄。邯鄲才人堪換馬。明星  
落木亂紛紛。同向山中臥白雲。秋風乍起黃花  
塞。明月初生青草墳。齊門彈瑟相知少。漢庭執  
戟郎官小。漸離筑傍流水立。干將劍上青虹繞。  
才子風流多落鳧。青樓狹邪善諧譎。趙玉刻就  
篋篋柱。蜀繒裂作鞞鞞索。禪燈繡佛夜厭厭。半



醉能歌阿鵲鹽朱公大笑黃金盡三十青衫一  
孝廉。

五言律詩

送孫明府之崇明

昔年芸閣侶。鳧舄向南征。官俸魚租入。衙齋蜃  
氣成。問程看日出。到海聽鷄鳴。地僻無官長。何  
須束帶迎。

送王和仲歸吳門二首

三載都門客。秋風憶故山。楚雲裝共薄。燕草鬢  
同斑。歌逐無魚斷。身隨一鴈還。祇應留滯者。別

淚易潺湲

燕山沙磧裏。送客暮雲凝。綠樹看疑霧。黃河到  
未冰。葡萄經魯醉。狐貉渡淮增。聞道腰纏少。何  
時過廣陵。

駕幸太學恭述

璧水鈞天樂。橋門鹵簿車。秋風清道早。朝雨灑  
塵疎。檢禮惟行菜。談經亦墜魚。不知稽古士。獻  
納更何如。

摩訶菴

秋木晚蒼蒼。秋雲入講堂。薜蘿名作女。桃樹出



從羌齋飯人天供禪燈。日月光西山三十里。爽氣近胡床。

宿圓通寺

下馬投香積。宵然霜葉紅。客心從罽礙。佛性自圓通。樓閣寒雲裏。山河明月中。如何依覺地。能使夢俱空。

碧雲寺

佛地有黃金。僧家住綠陰。驢驢支遁馬。孔雀梵王禽。秋竹沙中淡。寒山寺裏深。江南流水在。共有故園心。

弘教寺

樹裏山門破。蕭然無四隣。青松多結子。白社不逢人。已慨經千劫。何因問六塵。不留陶令醉。知是遠公貧。

臥佛寺

支郎太無事。終日一匡牀。綠竹書成偈。青蓮種作房客方。悲世路佛已倦。津梁不是逢僧話。安知慧日長。

掌羅樹

百丈覆蒼苔。黃金地上栽。不從霜裏落。疑向月



中來昔是嫦娥樹。今爲堯率材。試將題作社。何用白蓮開。

萬安山老僧

雲裏白頭僧。城中到不能。門人皆乞食。亭子獨傳燈。樹白知秦塞。天青見漢陵。不須留下榻。秋氣夜難勝。

金山寺讀故人黎司馬碑文

宛然江上寺。門對綠波開。珠刹昔新建。旃林是舊栽。秋雲禪際入。水鳥食時來。黃絹碑中字。因隣司馬才。

欲遊西山少傅朱公招不赴

由來麋鹿性。長憶入林時。縱有朱門約。難忘白社期。酒虛西第載。文免北山移。但使能開閣。重過未是遲。

賣宅別范于公

上書不得意。憔悴黑貂貧。寶劍辭知己。茅齋易主人。草移張仲宅。花別孟家隣。非爲無枝惜。深悲遠所親。

冬日同朱金吾遊少傅公園亭

別墅曉鳴珂。林堂雪後過。爲園依禁籞。鑿沼納



恩波山入朱絃盡松成翠蓋多不能陪謝傅無  
奈暮雲何

小至日與諸君白塔寺沐浴

歲晚客心驚他鄉覓化城日臨添線節人有振  
衣情塔鴈看何白池蓮浴甚清幸沾功德水無  
使六塵生

答項豹章

項斯雲臥處風土說東嘉白石巖陵瀨青山謝  
客衙問家隣瀑布指路入桃花莫恠詩清甚曾  
飡五色霞

下第後與顧君錫重遊碧雲寺

不盡看山興西風更遠遊重尋白馬寺同着黑  
貂裘凍柳無餘綠冰池一半流非君丘壑性安  
得共王猷

碧雲寺奉懷少傅朱公

每過東山地難忘謝傅棋泉經重聽處竹是再  
看時不落旃檀樹無冰功德池暮雲空自碧何  
以寄相思

圓靜寺

香閣馬頭攀登臨夕靄間霜寒半陂水木落一



禪關食施湖中鳥窓窺塞上山能令許玄度相  
過便忘還

妙應寺老僧

岩峩翠微半頭白一僧居病耳萬聲息齋心衆  
慮除寺田無復米香積欲生魚猶有耽詩癖留  
人壁上書

長安官舍訪陸尚寶子傳

五株楊柳客何事走風塵傳舍同流水功名是  
積薪金門容吏隱玉璽耐官貧坐惜年華暮重  
爲入洛人

冬夜同陳秀才雙塔寺門步月

上書人不問歲暮歎漂零塔古芙蓉黑城寒脾  
睨青月過馳道看水遶御溝聽莫謂元方小堪  
當一德星

陳黃門初拜太常席上有贈

太常辭補闕遂覺諫書稀月白看山出天寒放  
吏歸賜香薰手板請沐澣朝衣曲有周郎顧梁  
塵坐不飛

迎春日集華光祿齋中

椒盤出五辛下馬拂黃塵千里周南客明朝漢



苑春草生將去路花待欲歸人君有陶潛祿猶  
勝季子貧

除夜朱鴻臚宅守歲呈銀臺姜公

非爲食無魚由來耻曳裾山川千里夢鴻鴈一  
年書客舍銀臺並流年玉曆除侯生亦何幸得  
近子雲居

元日都門看早朝四首

春日滿皇都春雲乍有無五更齊玉珮萬戶共  
桃符天出臨軒語山當遶殿呼欲知王會禮先  
問漢鴻臚

萬國盡朝宗天門發鼓鐘樓成五鳩鵲闕是兩  
芙蓉賦待凌雲薦書堪計日備不如隨仗馬猶  
得近飛龍

春王正月朔執玉會群公天酒屠蘇綠宮花綵  
勝紅二毛潘鬢改孤劔陸裝空試問梅花使春  
風處處同

金門近碧霄丹陛九重遙不作燕山客安知漢  
室朝插貂天上賜舞象日南調一半垂楊色烟  
含白玉橋

人日集陸尚寶朝房



蕭然待漏處何異子雲亭綠酒逢人日金門訪  
歲星草生燕地白山入鳳城青莫道文園病相  
如在漢庭

穀日寄黎惟敬司馬

迢遞梅花信年年白髮生春逢雙鯉使書到五  
羊城嶺外田家潦都門穀日晴近聞軍司馬谷  
口學躬耕

十三日看燈市

香氣與人烟紛紛俠少年花過樓外看燈出市  
中懸若箇春無怨誰家夜可憐不知人共月能

到幾時圓

十四夜燈燕贈李娥

青山渾欲暮朱戶自留春已釋金吾禁何辭玉  
漏頻笛中梅怨曲燈下李佳人悞說行雲事襄  
王夢未真

十五夜余王二太史席上贈郭吏部

春月有佳色春星聚滿堂同年太史氏聯璧校  
書郎燈借青藜火衣添粉署香亦知山吏部容  
得懶嵇康

十六夜朱在明席上贈包上林



寄食王孫意東風草漸多夜燈紅有暈春酒綠  
生波鴈托迴文字花憐懊惱歌上林楊柳色明  
日問包何

送丘明府還蜀中

潘仁多美政奏最大明宮麥秀蠶叢外花開鳥  
道中山當行雨處官與列星同縣有臨邛客因  
之賦亦工

送陸明府之宜春

仙吏袁州去春風別恨增宮鶯三五轉禁柳一  
千層單父琴中佐河陽縣裏丞欲題廳壁記雄

有陸機能

席上聽王職方談永嘉山水

有美神仙吏風流丘壑情口中香氣襲掌上翠  
微生瀑水元如布雲霞舊有城不須婚嫁畢早  
晚採真行

七言律詩

送王元美伯仲南還

都下相逢歎黑裘歡情未幾復離憂身同燕馬  
空留骨心異盧姬只解愁烏鳥疏中俱是淚芙  
蓉匣裏已無仇還家莫說平津閣舊日明珠未



可投

中秋夜出試院對月作

棘闈初出夜何其鳳闕鐘聲欲起時人憶嫦娥  
天上住馬名驥裏月中騎桂當臨發誰先折瓜  
及將歸未可期聞道上林枝肯借今宵烏鵲不  
須疑

將遊西山范祠部檄告諸僧

姑蘇遊子客京華聞道燕山日夕嘉幽思未能  
裁白雪移文須爲報青霞維摩定遣先調藥天  
女還教預散花一點禪燈一龕月明朝來宿法

王家

碧雲寺泉上酌酒與朱十六

雲中流下不勝清石瀨濺濺只自平宛轉浮杯  
人不醉潺湲到枕夢難成分厨已足千僧汲出  
寺能爲十里聲同是黃塵騎馬客與君相對濯  
冠纓

嘲友人遊山先歸

青山猶未徧嶙峋又憶平康巷裏春棗樹迎霜  
何纂纂車輪入郭即鱗鱗白雲似笑先歸客綠  
酒難留不醉人猿鶴徘徊君獨去素衣重染洛



陽塵

翠巖寺繙經僧

一住青山無送迎。階前秋草與雲平。繙殘貝葉頭痕白。讀盡蓮花目病生。龍象千函安得徧。魯魚三載可能成。寒鴉似慣齋時食。飛下斜陽識梵聲。

山中夜宿奉懷宗伯林公

夜堂鐘漏不勝清。石殿蕭蕭佛火明。詩乍成時逢葉落。人方懷處有雲生。河邊共指星為客。花裏空瞻月是卿。欲採寒芳寄幽思。青山只隔鳳

凰城

碧雲寺遲華存叔鴻臚不至

馬上銀罌載綠醅。待君同入白雲開。郢歌欲和吟千遍。蕭寺相期望百回。流水無人空自聽。青山何事未能來。重陽時節無多日。莫更蹉跎郭隗臺。

湖上

鷓鴣荷葉滿秋烟。太液滄沱處處連。碧浪半湖雖似鏡。銀鞍十里不如船。堤同隋苑能栽柳。歌欠吳姬憶採蓮。不為無魚思故國。他鄉風物本

隗字音願去聲  
又音梳平聲唐  
人詩中郭隗多  
作平聲讀



凄然

入城戲簡范祠部

攀丘歷壑不經旬，無奈秋風已着人。  
澗道回看惟翠靄，城門纔入便黃塵。  
衣間脫下雲猶在，甕裏歸來月未貧。  
何事省郎雞舌厭，山中求到却無因。

山行承御史大夫王公見訪不值

蘭堂尚憶白蘇州，竹馬曾迎郭細侯。  
都下相逢霜正肅，臺中無事水長流。  
不知斧鉞閒能過，先載琴書浪出遊。  
惟有庭前燕草色，自公行處便

含秋

下第書懷呈納言姜公

鳳城簫鼓夢中聞，天上人間自此分。  
鄉路三千俱是水，世情一半不如雲。  
郢人歌後非無曲，冀馬空來尚有羣。  
君在漢廷司獻納，肯因流落薦雄文。

送莫觀察之秦中

執手躊躇輦路傍，秦關西去接諸羌。  
藍田過處人爲玉，京兆行時法似霜。  
青鬢猶存元許國，黃花雖好莫思鄉。  
涼州美酒葡萄色，聞道咸陽勝



洛陽

聞警

交河十月水潺潺虜騎秋高過黑山六郡平時  
元近塞一夫誰箇可當關雲中太守須重起日  
逐賢王未肯還空抱平胡二三策書生無計謁  
龍顏

出塞

幕前旗鼓殿前分笛裏梅花處處聞秦地護羌  
諸校尉漢家出塞五將軍祈連山下烽如月無  
定河邊陣是雲爲問朔方豪傑士幾人年少立

功勳

贈徐舍人

嗟君何事獨沾裳聞着烏啼黯自傷池上薇花  
空浸月堂前萱草不禁霜燕山雪作愁時鬢楚  
水猿爲客裏腸見說王哀廬墓處滿林衰栢淚  
痕蒼

得張將軍書

鴈稀魚斷兩浮沉馬上煩君寄好音一諾未能  
酬季布三言先已毀曾參因投白壁難防劍不  
識高山且罷琴憔悴王陽滿牀病彈冠深負故



人心

寄徐丈常父

鄉夢鄉愁病不勝一回聞鴈一回增燕山慣下  
重陽雪潞水能生九月冰機在不堪盟白鳥身  
微何以謝青蠅西菴松桂垂垂綠早晚歸來共  
佛燈

寄黃丈一之

漢庭空說起徵君吳市猶聞臥隱淪何處黃金  
能買賦誰家白璧肯周貧花間不醉無三日竹  
下論交共幾人寄語灌夫休罵坐古來賢達貴

謀身

至日懷諸太史陪祀南郊

園丘馳道草芊芊曠典重逢御極年 聖壽長  
如南至日 皇恩高似北溟天葭灰應氣迎鄒  
律松籟含風入舜絃最美翰林供奉客揮毫先  
進慶雲篇

寄蔣長康

十五年前傅粉粧家家持菓擲潘郎不知別後  
顏如土即恐秋來鬢有霜夜奏鳳凰調蜀女朝  
圖蛺蝶學滕王如今不及當時事客散呼鷹竹



滿堂

袁相國故居訪李孝甫太僕

魚文七首不離身馬踏長安市裏塵重過楊家  
舊亭子深悲侯氏老門人朱欄易主花無色青  
眼逢君酒可親同是中郎琴畔客一般憔悴各  
沾巾

贈臨淮李公子

一劍翩翩氣有餘都人皆識李輕車能騎白馬  
勤王事恥着青衫讀父書灤水河邊烽尚合石  
州城下戰何如侯家好勒燕然石莫羨相如賦

子虛

思歸寄皇甫司勳

射策上書俱不遇秋風夜夜夢歸吳花憐觀裏  
無多樹柳憶門前第幾株趙女怨爲廝養婦魯  
生羞傍叔孫儒惟君青眼能如舊不笑終軍手  
裏繻

玉皇閣對雪懷黃文淳父

雪後登樓興未賒仙人香案挂寒霞帝京初  
曉渾如玉宮樹先春已着花人意喜時消作水  
馬蹄行處踏爲沙黃公壚畔新醅綠游子如何



不憶家

長安立春日

城上高樓五鳳凰。春雲春日轉年芳。鏤金作勝  
家家帖。翦綵爲花樹。樹粧太液池中波。早綠昭  
陽殿裏柳。先黃隴梅消息。無人寄。斷盡江南思。  
婦腸

除夕贈歌者

除夕蕭條憶故鄉。天涯憔悴對何郎。非關傅粉  
天然白。不待熏衣自有香。爆竹且爲長夜飲。檇  
蒲慙逐少年場。巴人未解陽春曲。慙負清音繞

畫梁

贈翟德甫

長缺年年意若何。及時行樂肯蹉跎。往來朱邸  
風流甚。出入青樓薄。倖多桃葉可憐江上渡。柳  
枝如怨笛中歌。黃金未盡容顏在。莫問門前雀  
可羅

謝朱上公贈燈

春燈相贈子雲亭。不負松醪滿壺青。影亂簾前  
三五月。光添壁上九重星。瑠璣漫說曾爲障。雲  
母何須更作屏。明夜還來朱戶賞。樓生自愛五



侯鯖

正月十六夜長安步月簡朱少傅

少年場上立黃昏一片歸心不可言月到今宵  
微有鬼人從何處正消魂桃花騎出胡名馬竹  
葉携來魯上尊只隔一重燈影裏布衣那敢扣  
朱門

送盧太守罷官歸楚

日南啼鳥半含愁聞說盧敖不再遊剖竹曾行  
滇萬里迷花初罷漢諸侯故人開閣誰青眼刺  
史還家尚黑頭好去習家池上醉莫教山簡獨

風流

寄歐楨伯博士

董子談經鬢未絲官閒聞與懶相宜衙空亦可  
容魚墜俸薄纔堪買鶴騎首蓓一盤長不飽梅  
花三載豈無詩春風吹綠迷樓樹好寄隋家柳  
一枝

寄黃吉甫秀才

春風日日渡江來不寄江南雪後梅三尺芙蓉  
俱是恨一篇鸚鵡豈無才楚囚吟斷冠猶在梁  
獄書成網未開茂宰不能容國士桃花空向縣



門栽

贈吳京兆

一疏投荒鬢欲斑十年方得賜刀環  
燕郊棠樹栽初徧庾嶺梅花戍乍還  
從此諫垣焚夕草任他京兆畫春山  
不嫌問字頻携酒吏散鶯啼好扣關

清明日韋莊送朱在問南歸

清明對酒共天涯欲贈龍泉轉自嗟  
送別消魂惟柳色笑人歸去是桃花  
園林一曲仍韋氏兄弟多才比謝家  
可惜卞和懷白璧青衫濕盡出

京華

送吳中丞之金陵

建業青山是帝都  
蹙勞開府握軍符  
花間朱鷺銑歌曲  
江上黃龍水陣圖  
玉節中丞新盪寇  
樓船諸將舊平吳  
不知燕子磯前地  
容得陳琳草檄無

五言絕句

碧雲寺金魚

魚因聽法至池爲放生  
開不是腰間佩安能換酒來



七言絕句

弘教寺三首

先朝行殿作禪宮黃屋青山本是空聞道一人  
曾駐蹕山僧不敢住當中

內家金像出蓬萊千葉蓮花玉作臺試向白毫  
光裏看 聖人前世是如來

宣皇在日寺新成萬乘親來寺裏行芳草也知  
無玉輦秋風秋雨滿階生

望湖亭

亭邊楊柳水邊花落日行人正憶家不及江南

湖上寺木蘭舟裏載琵琶

長至後僧家看菊

過盡重陽與長至僧家黃菊尚嫣然城中說與  
看花客不信青山氣候偏

訪董述夫不遇

扣戶無人問四隣蕭然木榻滿黃塵知君只在  
長安市畫得燕山賣與人

長安春雪曲五首

春風吹雪下桑乾添得城中一夜寒鳩鵲樓高  
消不盡長安街上馬頭看



燕市集卷之三  
一半秦聲半楚聲秦娥調瑟楚娥箏鳳凰城裏  
家家雪但是紅樓凍不成

御柳黃絲未滿條宮花紅藥不勝嬌  
至尊看雪開温室親賜昭儀壁上椒

煖玉琵琶寒玉膚一般如雪映羅襦  
抱來只選陽春曲彈作盤中大小珠

勒寒桃李未成蹊啄雪流鶯已自啼  
進得貂裘渾不着 聖人春日賜征西

題董生春山障子贈朱金吾

董生留我子雲亭畫盡春山酒未醒  
贈與侯家

金屋裏美人筵上鬪眉青

都下寒食

騎馬尋春春尚遲東風空自向人吹  
燕王城裏千株柳寒食來看未有絲

送余君房下第還四明四首

白馬長嘶過酒樓斜陽斲解黑貂裘  
隋家珠子如明月魚目中間不肯投

一匹如龍渥水駒桃花遍體號駒駝  
憑君莫話千金骨世上於今只按圖

黃金臺畔送君行易水悲風滿座生  
我亦東歸



無不可要離墓下有田畊  
千樹啼鶯花自紅江東歸客怨春風馬頭躡躑  
光如雪知是干將在匣中

送陸承道之南都御史府叅軍三首

一葉春帆樹裏飛春江春水綠依依送君先入  
芙蓉幕待我同遊燕子磯

汗血連錢鐵色驄障泥新繡紫芙蓉春風一騎  
金陵道多少人看陸士龍

鍾山王氣似龍盤青滿梁恩日日寒揖罷中丞  
將手板喚人收印捲簾看

傳

太醫令支君傳

醫故方伎士能以術濟天下故晏子謂其功與  
良相等孔氏以其有恒事與巫者略同遂並數  
曰巫醫云後世不察也由此或卑醫然醫亦自  
卑也操三指入公卿門顧望顏色諾諾惟命莫  
敢吐氣有天幸投一藥偶愈即厚索黃金歸不  
幸則坐視以敗嗟嗟醫安得不卑乎哉京師醫  
最多當天下一什伍以余所知善稱為良醫師者  
惟毘陵賈君藝及東海支君秉中二人二人於



公卿未嘗不入所投藥未嘗盡愈愈亦未嘗不取金然惟視病不徇人意指病弗可愈藥弗妄投或強而投卒莫之愈也以故病者輻輳兩家門外屢常滿不惟藥且愈者德二人雖弗愈弗投藥及強而投弗驗但得二君一言皆奄然委其命以盡無憾已賈科大人而兼攻兒醫支以顛顛名而察大人脈皆奇中二君術蓋相通云賈朴茂有林壑之氣支善經術於先代及今世典故靡不了了人益莫測其奇賈視主人諱疾者必委曲令自解但求濟無取苛直支至則索

赫蹏署病可否云從吾藥不從吾去迺公安能為若首鼠哉二君志氣不倫逮其術久且神人兩稱之無間也然賈僅僅自樹為長者而支君為鄒先生畫秘策又甚壯

王先生曰 肅皇帝時嚴相虐焰炙天下鄒侯批逆鱗而奪之氣讀其書未嘗不吐舌相視也後稍稍傳其謀出於支君支陽出入嚴相家而陰刺其短報鄒鄒遂得其要領云夫射白額者其殼百鈞蓋非持殼之難而發其機之難也若支君豈徒方伎之士哉



序

贈吳大夫序

他日董先生遇王生於燕市從酒人沽濁醪壽  
王生慨然談吳大夫之爲人甚悉曰生爲我序  
之我當盡一石方大夫之以賢聲聞於四方也  
又多橐中裝能結客故四方之士無不跂踵慕  
之願爲交游其所結駟於門者豈少青雲之彥  
與曳裾彈鋏之夫哉顧心最善董先生董先生  
爲人多技能以酒自晦形氣頽唐性尤不喜禮  
法之士豈惟人不知先生即先生於世固落落

鮮合矣惟吳大夫與之爲莫逆交吳爲江左文  
獻家他墅別業皆擅丘壑之美董先生無不遊  
也假山池榭無不窺也竹深花迷無不徧也青  
箱牙籤插架連屋無不閱也金石釜彝圖畫丹  
青無不諦觀而欣賞之也吳氏他客諸凡以藝  
自售者魚貫門下爭欲出其奇以中大夫之心  
視董先生如不了了者而大夫禮之不與他客  
等他客心異之皆莫喻其旨吳大夫見董先生  
之無食也趣爲若買田無居也趣爲買屋無使  
力也趣與之僮奴董先生若不聞者然曰嘻爲



廼公置葡萄五斗庶幾哉諸客爭笑之而大夫  
由此乃益敬董先生蓋廿年如一日焉董先生  
之遊長安也持七首出門不復顧家人問生產  
曰業已付吳公徑去大夫所爲董經紀其家者  
靡不至繒絮醯醢魚鹽薪粢凡伏臘寒暑之具  
事事無令有所闕曰勿以累先生先生亦不聞  
也嗟乎士所稱知己者非耶世無國士之遇父  
矣諸侯大夫往往挾所有驕人或受其惠即犬  
馬蓄之客利其金錢賂遺不爲怪也是王與客  
罪等耳夫吳大夫之居陽羨也人知其爲佳公

子也其爲牂牁太守也頭尚黑一旦擲其符竹  
而去人知其爲見幾也而不知其能善交人其  
賢若此也董先生人知其繪事辭章與善酒而  
不知其感恩爲烈士也然其感吳大夫也不以  
五馬不以黃金而獨以其知己僕由此非特重  
吳公乃益賢董先生矣

送行太僕主簿徐君之甘肅序

自漢天馬產於渥洼而馬之良遂獨稱雍州甘  
肅卽其地也方今 國家全盛蒼頭厮養之卒  
期門飲飛材官蹶張之士千騎萬乘雲布星列



所以強中夏而威四夷者莫不於馬是賴既設  
太僕寺於京師董其事其外則山西遼東陝西  
甘肅有四行太僕焉官佐聯絡與京師相當寺  
卿貳禮視方伯廉訪使丞簿之屬猶得與州郡  
諸侯刺史鴈行縣大夫以降弗論也夫四海之  
大百司之衆犬牙相參穆穆就列隼旟熊軾之  
吏獸符玉節之臣所爲 陛下奉犇走稱任使  
者豈一人哉而必其事屬之行太僕則 朝廷  
之留意馬政與治馬之臣其重不輕彰彰矣頃  
聞石州陷虜而甘肅邊於西羌蕃漢雜處十里

一烽五里一燧亭障斥堠錯綜相半官其土者  
比之謫宦然至於 明命欲下委而去之嗟乎  
國家養士旣試而後用之非有擇於其地之險  
夷身之勞逸與事之難易固將欲深賴其力也  
如必得其夷且逸又甚易者而後行又何所利  
於若人也哉婁水徐君旣選爲甘肅行太僕寺  
主簿七首插腰幡然來辭夫黃塵沙磧居厦屋  
者之所難處酪漿苜蓿饜肥甘者之所弗堪余  
觀徐君意翩翩壯甚也豈其裘馬少年之氣在  
耶不然有千里汗血之好耶抑塞垣荒漠之地



烈丈夫之所欲身試而親履之耶余觀甘肅隸  
雍州古月氏之族紅岸左峙青海右匯張掖酒  
泉形勝百二其山崑崙黃河之所從出也川卽  
弱水條支禹貢之所載也其千古出師之略有  
析連瓜洲之舊蹟焉漢大將軍霍去病建旗鼓  
破匈奴處也玉門班超之所生入也陽關唐人  
嗚咽而歌楊柳者也君躍馬褰帷蕭然過之豈  
不增俠志而消羈思耶異時孳牧課息芻秣以  
時雲錦塞川駒駝滿山 明天子寧無以酌君  
者哉若夫鸞旂在前鼉鼓在後出警入蹕無所

用武吾恐驂駟駟之困於棧豆間也君將進  
涼州醞一斗擊唾壺而歌曰老驥伏櫪志在千  
里酒酣烏烏不知耳之熱矣

壙志

朱氏殤女壙志

余居晉陵時與馬大沙相隔一江沙上蓋稱朱  
家云時從諸先生長者言朱在明能結客心翻  
翻壯之未識其人今年秋邂逅在明於燕市黃  
髮如戟有鄴下兒態故知其非脂韋生矣已而  
在王青州席上聽其言嗚嗚不平如易水歌聲



朱君信快士哉始與之交甚善余射策不利主  
於其家聞其女未字也請爲少兒荆蠻婦朱君  
曰是非吾生吾弟女也吾鞠之卽吾女然必報  
吾弟若婦而後可使者去未幾而其女病病二  
十日而殤殤後半月而朱君弟在止書至云如  
命以女許王家郎嗚呼燕吳相去四千里方作  
書時安知其女之殤也與在明相對歛歔者久  
之朱氏先爲太倉人由判簿君徙居馬大沙雲  
仍相公爲邑中著姓枝葉甚繁弱者猶無慮幾  
百指而在明獨有子不育其仲父桐廬公以經

術鳴於江南江南學者從之如雲若子夏在西  
河時也顧心最愛在明在明方喪子意甚哀桐  
廬公恐其無以自解也俾育其孫女女亦秀慧  
能得其父母心刺繡五紋不習而解教之書善  
誦字過目輒不忘以故在明夫婦憐之甚當其  
病時匍匐苦辛食不能下咽曰吾何以自解於  
吾仲父與弟若婦耶夫心卽不愧死生命已第  
五生一夕十起何爲哉以隆慶丁卯十一月十  
三日殤距其生嘉靖辛酉九月日僅七歲嗚呼  
可悲已夫在明將歸其骨於故丘之殤穴俾余



為銘是雖不得為王氏婦也然業已心許之矣  
故銘銘曰

翠眉消黃口亡一枝紅芳萎於燕霜雖則萎霜  
許歸於王遺鮓一匣言旋故鄉是為朱鴻臚之  
女郎

誄

大中丞瑯琊王公誄并序

大明隆慶元年 上初即位二曜再朗 詔令  
天下咸與更始於是故中丞瑯琊王公以枉坐  
法蓋八載矣二孤惇惇伏闕言狀 制下有司

直其寃俾還元官以葬嗚呼發枯條之花生白  
骨之肉布陽春之仁嗟死灰之燼其為 聖明  
曠蕩之澤真萬萬無涯矣夫圖形雲臺藏功石  
室者 國家之令典也流芳竹帛列名不刊者  
太史之故事也若夫積累懿德闡耀幽潛抒哀  
傷之思興無窮之慕雪既往之辜貽方來之譽  
不能無假於誄卽令穉登鄙無文使不托之筆  
札綴之言辭其何以自附於悼亡悲逝之誼哉  
誄曰

鬱矣王公瑯琊巨宗珥蟬插貂珪組重重遠祖



事宋黃門納忠雲仍耳孫司士江東青氈弗歸  
編戶爲農崑岡之產蒼壁黃琮桓桓司馬大纛  
高牙駟馬赤車以起其家爲公顯考傳公五車  
公性早慧天馬渥洼注髻而子都坐客驚嗟麗藻  
翩翩弱管生花書留素裙碑賞黃絹綦組纂績  
賦成魯殿文章五色衆口傾羨羽翮旣齊一飛  
青雲鷹鷂搏擊凡鳥羞羣指佞觸邪柱後惠文  
晉楚星軺墨吏紛紛解印以去勿逢王君塞垣  
隱憂蕭條組練徙薪徹桑公獨先見見疏草叮嚀  
曰守曰戰士飽馬騰堅壁深塹庚戌之歲虜窺

燕都滹沱未冰隔河吹蘆公登譙櫓石畫秘圖  
鞭弭橐鞬楛矢滿壺犬羊夜犇楚幕有烏

先帝曰能錫之金符何以酬功御史大夫感恩  
忘軀遑恤頭顱慧星東掃角而光芒散爲羣凶  
鼎沸扶桑公執軍麾以登餘艘魚鱉爲兵虹蜺  
爲梁蜃爲樓船爲梯爲航翦其長蛇海波不揚  
南征未罷北伐相繼鴈門覆師言者短氣 詔  
公移軍倚角幽薊公惟一心何險何易降胡千  
帳車輻 神京公來爲重公去爲輕豈必萬雉  
公惟長城司農金錢山積如堵斥其羨餘悉歸



行伍椎牛饗士轅門伐鼓刑徒良家超距扼虎  
願爲公死請奮厥武玉門酒泉烽烟晝開一戰  
破虜執其渠魁獲其牛羊取其貨財駭牝橐駝  
髦倪歸來亭障春耕歡聲如雷功高賞薄軍書  
不上誰爲青蠅讒舌萬丈燕收樂毅漢棄魏尚  
烈士彷徨負戟惆悵羌笛嗚嗚悲歌夕帳嗚呼  
哀哉何謂薏苡明珠如月覆盆匿照園扉土窟  
楚囚三木腸斷獄卒嗚呼哀哉雙雛皇皇請代  
不可我不負國國寧負我嗚呼哀哉燕霜飄飄  
黃霧四塞日寒如水星隕爲石旅魂無依屬鏤

三尺蓋棺悠悠公論未白嗚呼哀哉公之雄才  
七首芙蓉鷓鴣之鏗能斷蛟龍公之意氣指顧  
揮霍糞土千金山河一諾公之胸臆泛愛開美  
無枝寒松見底秋水公之孝友人無間言質之  
父母稽之弟昆公之敦倫洽比其族給喪千畝  
待嫁百斛公之結客信義俶儻魯連釋紛樂布  
死黨公之清風室無姬姜雖有變童不登其床  
公之文章珠玉咳吐圍中草檄馬頭露布公之  
勲名戲下流涕春草不生青血入地嗚呼哀哉  
黃河如鏡紫氣入關



真入御宇天運轉環遺孤伏闕飛淚潸潸烏鳥  
陳情乃回天顏雪公深冤還公舊班嗚呼哀  
哉何德非君何罪非臣慈母投杼大賢掇塵驂  
乘萌禍傷心古人白骨憔悴青山嶙峋雖有龜  
綬不及公身誰謂長夜不能再晨誰謂幽谷不  
生陽春滔滔江漢恩波無津明明日月重光重  
輪伐彼蒼厓以刊麒麟哀哀孝子沒齒自新嗚  
呼哀哉

書

與王元美伯仲書

與兩君別後送客不能復過真空寺矣見寄朱  
十六書亦及不佞意同之也今歲邊聲獷甚  
聖天子宵衣殿上廟堂諸公石畫秘笈虜得不  
深入爲寇僅陷石州一城州刺史不能罵賊死  
爲賊縻以去灤河水未合時賊偵者二人騎而  
測其淺深一騎溺一網得之王師隔河不發一  
鏃竟成漁人之功近聞王台吉禡牙鳴角有窺  
關隴意所賴社稷靈長當無慮也君家中丞  
功滿塞垣間冤血灑地十年後始白於天下可  
謂幸哉有子疏草字字嗚咽有三峽流泉聲王



家郎如馨中丞公不死矣然妬口刺刺卒未休  
直爲二君蛾眉耳願益堅東山之志勿令此曹  
藉爲口實也不佞狹中福心雖重爲諸君所規  
至今氣憤憤不能平下第後便匣蒯緱南歸此  
間公卿大夫稍有留之者蹉跎及今意甚悔之  
年過三十不成名尚能跋跋逐人學兒女子態  
耶家有老歌姬能爲四絃裂帛藝明年春歸過  
邯鄲道上出橐中裝娶一趙女彈箜篌合奏之  
今秋買胡僧紅罽衣赤如火并購小黃金像三  
五軀燕山白石如胡粉匠者善造阿育王舍利  
塔雕鏤若鬼工他日鑿成小窰堵波携歸樹於  
半偈菴前青桂之下此一袈裟地豈不可容吾  
箕踞乎誅文奉命撰成然小巫見大巫氣索然  
矣聞寒家戶外木如林大無謂家兄長者不宜  
爲此當是其東床兒腐鼠君謂吾縣官亟還其  
家不然不佞捐數十金募夫徙去以五株楊柳  
代之毋父溷陶公門也



隆慶庚午三月

靖江縣朱宅快閣雕本

燕市集卷下

青雀集序

西河毛文燁撰

余讀王子百穀青雀集蓋歎今世之才者之阨於時云夫人患無其才才既善美患當路弗之知耳苟忱恂迪知曷嘗不樂道人主之側而同升廟堂之上乎粵古暨

二祖天造勿論迺

宣英朝所謂守文之世非

耶當其時東里南陽之於嗣初子傳睠顧推援並晉諸侍從論思之列此豈曠曠弗聞與聞而陽浮虛好之哉百穀思致翩翩閒於文學他著



隆慶庚午三月

靖江縣朱宅快閣雕本

燕市集卷下

青雀集序

西河毛文煒撰

余讀王子百穀青雀集蓋歎今世之才者之阨於時云夫人患無其才才既善美患當路弗之知耳苟忱恂迪知曷嘗不樂道人主之側而同升廟堂之上乎粵古暨

二祖天造勿論迺 宣英朝所謂守文之世非

耶當其時東里南陽之於嗣初子傳睠顧推援並晉諸侍從論思之列此豈曠曠弗聞與聞而陽浮虛好之哉百穀思致翩翩閒於文學他著



作不可殫已卽今所集詩章簡牘廉直慨慷一  
壯夫擊楫之語也其把臂而接懽慤者固天  
子之三公九卿及貴近之士大夫耳徒與百穀  
相勞問曾無一人攷諸故實而推轂引重竟使  
之寄情青雀而宣鬱滯於洪河大江之濱悲夫  
悲夫或謂百年事遠人所創見不觀 肅皇帝  
初乎文先生上計京師維時喬楊居宰執猶互  
爲論列官之太史氏百穀才視待詔君吾不知  
所後先而方今開館修 先朝實錄學士抱咫  
尺之藝咸嚮風矣假令百穀與館中諸士絜長

度大其亦爭衡並驅斐然成章者也何哉縉紳  
先生知百穀者良夥終靳一紙之書而先民之  
甚盛舉卒無聞哉是豈非才耶抑知之者非其  
人耶詩曰矧伊人矣不求友生斯之謂矣余三  
復之餘每搔腕而加太息者也百穀所譔次往  
往傳諸好事者之口而此集則其附朱在明南  
還時青雀舫中所著云在明心憐百穀之才而  
鄉往焉特其位不充志弗克揖讓知已於朝著  
間尤悼今世知者爲習諸求欲成其名於後世  
以俟賢知之稱善茲用刊布而永其傳從此知



百穀者深遠矣余未識在明聞其任俠能文卽  
是可觀哉彼徼一第獵一官輒咤其語爲百穀  
重者其於朱君何如耶蓋一時公卿居官守法  
之常道也

青雀集序

郡人王世懋敬美甫撰

始余客燕市王先生百穀以其燕市集屬余序  
也余業不敢任則漫應之曰請以是繼今而作  
者居亡何百穀試京兆不利歸而會鴻臚丞朱  
君在明以使事乘傳順道取吳閩百穀故厚朱  
君則坐其青雀舫中鼓吹其上觴詠時作哀所  
得集之命以青雀先書抵余曰曩不能以燕市  
子累者爲有後命今且徵斯言予惟士不得志  
類仇軒冕而薄矜眩發爲言不能多卽多道其



抑鬱耳而百穀乃不然浮河涉江不能兩閱月  
所得詩若文卽操觚之士閉戶擁被窮年而不  
能得者抑何夥也扣舷乘風若津津於青雀而  
榮之談者謂王先生慢世得無似之乎夫士窮  
年而不能得王先生得之於兩閱月之間又工  
好若是是其人才致縱橫寧以一時小得失爲  
意者予故知王先生非慢世者也談者曰子何  
以知之曰以朱君知之朱君爲人有意氣而雅  
能詩王先生與之游舊卽能慢世獨能薄朱君  
哉予知百穀者請以是爲序而書謝之曰幸及  
而之失意歸也以百穀之才豈難一第者一旦  
身擁六傳口作金華殿中語當不假余言重卽  
言之不能如今日窮時交矣



青雀集目錄

卷上

詩

出都門馬上口號

下滹沱

邵熊二戶部過訪舟中

天津寄范光祿

寄贈李司徒伯玉

贈李仲玉鴻臚

贈邢德州



昔者行贈別姜祭酒先生

流河驛

滄州夜泊

景公道上牧犢翁

安陵夜泊戲簡朱在明

四月十七夜東光縣見月懷童子鳴

阻風登慈氏寺因簡邢德州

慈氏寺留別邢德州

廣川弔董仲舒先生

武城阻風

渡口驛阻風懷童秦二子

臨清觀音閣下泊舟懷吳幼貞

奉寄太傅朱公三首

與朱董二同志登大寧寺閣

聊城道中懷龍使君

聊城

奉寄外舅陸公

寄內

代內答

舟中端午懷兒子硯生荆蠻女兒鳳凰因



呈朱十六

見月懷女兒

寄伯氏詩四首

獲麟渡

月夜到任城過太白舊樓因懷李觀察使君

濟川上望太山作

新河篇

垞城阻風見溺者餉卒賦公無渡河四章垞城夢見先蒯碩人

彭城

過呂梁走筆呈董復生

舟中逢北來客聞龍使君新拜太守意疑未是蜀郡

下邳夜泊雨甚童子持盤嬰盛水床頭亂鳴戲示此作

雨中渡黃河作軍中樂因成放歌行留別朱君在明

奉寄太師成國朱公二十八韻

清口驛阻雨



漂母廟寄顧朗生

寶應舟中臥病逢張將軍北上

寄李舍人兼呈少傅相公

病中過高郵李鴻臚見訪

露筋烈女祠

邵伯驛

維揚阻雨

臥病過江都歐博士見貽太山記因贈

渡江寄吳氏伯仲

雨中姜司成邀遊焦山二首

焦隱士祠

三詔洞

吸江亭

京口夜泊江水汎濫壞客舟問訊朱君

會景堂七詠

懷墨池

卓筆峯

海虬壑

雲芝巖

來鳳徑



影龍橋

明碧洞

過汝立小聽松因寄童子鳴

卷下

傳

徐先生傳

墓表

顧大有先生墓表

誄

吳太僕誄并序

疏

建造顧徵君祠堂疏

書

與李司徒伯仲書

與范光祿于公書

與邢德州書

謝邢使君書

與王武定書

奉陸海豐尊丈書

寄大司成姜公書



與顧君錫書

與趙將軍書

答朱太傅書

與喬比部書

與邵戶部書

與熊戶曹書

與李司徒伯仲書

與王職方書

與李舍人書

與王元美書

與王敬美書

與歐楨伯博士書

與朱在充書

與朱在問書

與馬鴻臚書

與吳中丞書

與姜司成書

謝姜司成書

與黃吉甫書

與唐玄卿書



奉陸先生書

與陳觀察先生書

青雀集目錄

青雀集卷之上

詩

出都門馬上口號

太原王穉登撰

長安東門別立馬青松下關吏來笑人前年棄  
繻者

下滹沱

青瑣故人稀青山憶採薇雨兼花共落春較客  
先歸臺豈黃金在田應白壁非滹沱何太急臨  
發更依依



邵熊二戶部過訪舟中

省郎能問字傾蓋薊門西同舍聯雞舌分曹並  
馬蹄河流行處滿柳色折時齊已恨論交晚匆  
匆况解携

天津寄范光祿

海樹微茫近驛亭晚霞初落滿船青能詩光祿  
如相憶銀漢中間是客星

寄贈李司徒伯玉

漢署郎官盡少年李邕文采獨翩翩能籌鹽鐵  
陰裨國善筭緡錢日助邊楊柳一枝勞贈別蓮

花九品學逃禪知君最有鄉關思早買江東種  
秫田

贈李仲玉鴻臚

青鬢青袍典客郎年年執戟侍明光琅玕待譯  
知身毒翡翠因言辨越裳海外三韓稱屬國日  
南諸詔頌明王煩君爲問輜軒使願謝西戎罷  
白狼

贈邢德州

廣川經術自紛紛剖竹邢侯復好文廳事遙看  
東海日屏風皆畫太山雲辭金不愧楊夫子載



石還同陸使君四月平原芳草綠可能携客射  
鷗羣

昔者行贈別姜祭酒先生

昔者薄遊燕王都燕人買駿皆買圖汝南袁公  
善相骨稱我一匹桃花駒是時先帝論封禪  
焚香日坐蓬萊殿二三元老書不停記室豎儒  
供筆硯袁公手內金花牋口召王生生不前安  
知徐福三山事但憶蘇秦二頃田我欲東歸勸  
我留滿床詩草盡見投我時醉操銀不律雌黃  
爛熳珊瑚鈎以茲感激國士知新舊存亾不可

移季札匣中鏌鋣劍脫挂徐君墳樹枝浮雲世  
態那堪說衆人聞之皆不悅謝傳西州春草深  
羊曇涕淚空成雪贈刀人結襪子可憐貧時交  
一生與一死召公已死周公嗔道傍之言未必  
真馮驩不去反見忌天下盡諱爲門人宗伯中  
丞本愛才乍聞此語亦徘徊惟君知我有心者  
肝腸傾倒無所猜校書舊物許荐我君縱殷勤  
我不可子虛欲奏雖未成知己難忘楊意情長  
安國門同日出我歸金閭君石城壁水曾經  
黃屋坐祭酒胡床尚虛左苜蓿先生三數公桃



李門人千百箇紛紛入貲同舍生春秋俱服左  
丘明君行未可輕此輩萬一中間有馬卿

流河驛

青草不生地黃河空接天香醪供使者繫纜驛  
門前

滄州夜泊

綠樹孤村夜邏嚴家家盡賣水精鹽虬髯海客  
休相覘青雀舟中一孝廉

景州道上牧犢翁

黃牛三五犢青杏一百樹老翁伏牘足景州城

北住

安陵夜泊戲簡朱在明

樓船夜按軍中樂月上柳枝人不覺典客官如  
白鳥閒安陵酒比黃河濁

四月十七夜東光縣見月懷童子鳴

遊吳與去燕同爲未歸客兩處人斷腸一輪月  
生鳧

阻風登慈氏寺因簡邢德州

蘭若廣川東停舟覓遠公觀心心不染問法法  
皆空金像茅茨下旃檀瓦鼎中淹留有地主非



爲石尤風

慈氏寺留別邢德州

但有袈裟地悠然寡世喧漫勞州五馬同訪給  
孤園綠草迷鐘簾黃河易寺門縱令依覺路爲  
別亦消寬

廣川弔董仲舒先生

薄遊田齊疆佇覽賢人墟百雉何蒼然平楚罕  
民居炎炎漢西京乃有董仲舒卓哉天人對垂  
之千載餘樵蘇及里門過者式其廬蕭條玉杯  
篇零落竹林書耳孫微以囊金中皆生魚緬懷  
江都事足以增唏噓往者多未遇來者寧獨余  
不如一斗酒能令百憂除

武城阻風

十里垂楊五里村南風吹客客消寬絃歌縣裏  
澹臺宅茅屋蕭條幾葉孫

渡口驛阻風懷童秦二子

顏風生碣石層雲出之杲羲和匿其光不辨魯  
與鄒行者何勞勞居者未得休客子安所歸停  
橈宿古郵候人率水濱峙餽持乾饌高林無寧  
枝濁涇東西流不見同心人馬能寫我憂吳津



涉江波越徑阻山丘昔爲膠與漆今爲女與牛  
愧彼嚶嚶鳥友生亦相求安得乘風翼尺素雲  
中投

臨清觀音閣下泊舟懷吳幼貞

紅粉樓中曲斷腸青蓮寺裏客思鄉分明嘉靖  
年間事曾與崔郎共乞漿

奉寄太傅朱公三首

總角弄柔翰肆志偃商業三十登燕臺上書意  
不愜因人性所鄙未肯事干謁十年懷一刺至  
今猶在篋諸侯不好客何以寄長鋏桓桓執金

不傳桓人  
般

吾皎皎丹青心迴車大道傍馮軾以相尋蕭條  
段生廬緹騎森如林以身當國士豈敢論黃金  
旣拂蛟龍劍復鼓朱絲琴

西園盛文學翩翩清夜遊車騎如龍行冠蓋若  
雲浮禰生托後乘袒裼衣岑牟摻搥中哀節罷  
瑟停筮篋朱門廝養卒廬兒及蒼頭紛紛執鸞  
刀一一傳綠鞵千金治嘉膳百金列珍羞焉知  
刻漏盡但促羽觴流賓醉主不醒天河下城樓  
野鶴畏乘軒山麋恥駢輓丹轂朱繁纓能忘在  
丘澤長林多青松其下生琥珀斲地煮食之可



使頭不白豈無南枝戀萬里久爲客夜醉平原  
家朝出平原門雖受平原知未報平原恩燕歌  
短促節立馬聲皆吞黃鵠志四海枋榆安足論  
幸免遭彈射終當復飛翻

與朱董二同志登大寧寺閣

去國同僊侶不知行路難黃河天外曲白日寺  
中寒梵宇從唐建齊山近魯看鴻臚情戀闕把  
酒問長安

聊城道中懷龍使君

流水淙淙瀑布聲扁舟夜雨近聊城思君忽作

三刀夢游俠空慚一箭名盡以着裘輕季子誰  
因結襪重王生漢家豈是忘循吏應惜吳民借  
寇情

聊城

燕將嬰城日孤軍井灶餘太平無戰鬪不用箭  
頭書

奉寄外舅陸公

歲歲年年只著書可憐生計釜中魚不知燕子  
樓安在始信麒麟夢果虛陶令已無栽柳處戴  
公誰爲買山居東床女壻漂零甚莫問還鄉駟



馬車

寄內

柳花化浮萍不能復上枝丈夫狗功名安問還  
家期去年與君別庭中辛夷花今年花若何遊  
子正思家花亦當再開人亦當遠歸歸不待秋  
風勿寄秋風衣喜鵲知行人飛上門前柳試問  
蘇秦婦還能下機否

代內答

妾本金陵人家住長千里恥嫁里中兒三十事  
君子蒙君采葑菲不復論下體君棄妾遠遊妾

為君白頭淚如山中泉涓涓日夜流織成芙蓉  
錦四旁為清江鴛鴦飛其間十五五雙以錦  
裁寄君憂心未能降聞君將到家斲拭紅妝啼  
君勿過疑妾妾乃老萊妻

舟中端午懷兒子硯生荆蠻女兒鳳凰因

呈朱十六

他鄉嘉節對鴻臚細雨輕帆客思孤何用更添  
長命縷也知難覓辟兵符桑弧漫憶田公子龍  
舸誰招屈大夫弱女嬌兒總腸斷一杯安得共  
菖蒲



見月懷女兒

淡淡新月輪涓涓初五夜宛宛女兒眉纖纖鏡  
臺下但記別女時不記春與夏以手攬我裾令  
我不能舍我行未出戶勸我早還家一去如飛  
蓬隨風繞天涯骨肉徒紛紛曾不念契闊感此  
婉變質遠致一書札上言避寒風下言慎飢渴  
使我淚如雨太息不能答既爲汝強飯復爲汝  
添衣憂卽爲汝憂歸亦爲汝歸歸來黃河邊水  
落舟不前黃河自入海行人如上天家遠未能  
到月出未能圓人生念兒女安得長少年

寄伯氏詩四首

田家紫荆樹灼灼庭除中纏綿連理枝宛與手  
足同繁英開且落飄飄逐春風朝爲同心花夕  
爲無根蓬東風吹入戶西風吹入泥豈不同樹  
生參差胡得齊何異兄與弟隔越阻東西  
我祖樹令猷燕翼貽子孫哀哀先君子灌溉培  
其根吾兄纘前休垂陰乃益繁嗟予末小子束  
髮事討論未能取軒冕非敢遁丘園不乘駟馬  
車無以大其門天道如斟酌勉哉異後昆譬如  
桃李花成蹊本無言



落落蘇孺生于時不見取舉世擬擬之謂言長  
已矣一佩黃金印還鄉耀閭里家人前伏謁妻  
嫂羞不起英雄亦何常一屈與一伸屈則蟠泥  
中伸則登要津富貴如鴻毛而能易交親與君  
托骨肉豈比行路人

至音不諧耳至寶不悅目牙生輟其絃卞氏乃  
削足鉉刀稱芙蓉珣玦以爲玉知者俟其時懷  
之在空谷空谷何所依墳麓美同聲雖有百良  
朋不如一弟兄良朋况未歎兄弟寄死生相彼  
綿蠻鳥求友徒嚶嚶雖渠赴急難搖搖飛且鳴

獲麟渡

鳳鳥鳴盛代騶虞應至仁天馬躍羲河黃龍浮  
禹津靈物協昌期羣臻良有因衰周解其綱大  
道日荆榛魯無王者作安得生麒麟按圖磨一  
角牛尾及麕身識記表哲后得之以爲珍其生  
或匪時豈免凡蟲倫皇皇宣尼氏拚泣示門人  
千載過其墟舊跡濁河濱躊躇里巷中於邑訪  
遺民非敢悲道窮意亦良苦辛

月夜到任城過太白舊樓因懷李觀察使  
君



圓臆靡遺輝湍瀨無停波崇墉俯潺湲層榭瞰  
嵒峩環岳錯衆巘赴海交羣河洙泗非一流鄒  
嶧皆重阿懷賢心實勞感昔意逾多往軌旣參  
差今躅亦譌訛瀲灩魯城樽嬋娟巫峽娥悵矣  
金龜彥悠哉白駒歌世越分豈殊神符情匪他  
卽事寡歡悰眺遠益滂沱天人湘江漬矯首意  
如何

濟川上望太山作

魯爲諸國望岱稱五山尊湯湯汶與濟洙泗亦  
同源聖人生其中千載俗猶敦涉者皆問津輿

者濡其轅遠矚封中雲亭亭若車輪不辨青芙  
蓉但見朝隰昏離離大夫樹古柯凡幾存衛以  
石門扉繚以朱藩垣金檢玉籙書恍惚埋其根  
無由歷秦封安得見吳門盤桓不能前盱矚勞  
心竟

新河篇

歌風臺前泗水流千年不斷如衣帶一杯瀉入  
留侯城井灶浮沉半沙汰留人種桑處隴畝波  
濤鳴昨日黃河中今日青草生田爲海民爲魚  
鷄犬巷蛟龍居司空未署水土奏太史難上河



渠書千錢夫築岸三尺十戶牛牽土一車一石  
濁流半石青泥怒者決防溢者潰隄乍高乍下  
或東或西男子出門匹婦餉老翁執畚孤兒啼  
鑿石白塞瓠子人力豈不齊一成與一毀夏王  
刊木有神功隋人種柳真長技薦嘉璧陳犧牲  
聖人御極河水清舊河旣竭新河旣成 陛下  
垂衣萬載昇平

垞城阻風見溺者餉卒賦公無渡河四章  
公無渡河河之水湯湯蛟龍齒如鑿鄒千將以  
人血爲酒人肉爲糧柰何乎公盍歸來兮故鄉

先逍遙後號咷猛獸有穴鳥有巢嗟嗟匹夫沒  
於淵濤

滔滔者水耶浮沉爾耶孰爲父母耶妻耶子耶  
家萬里耶安知爾溺以死耶

河水西東兮魚兮鱉兮葬汝於腹中兮

垞城夢見先崩碩人

漢王城北客沾巾此地元無孟氏隣夢作慈烏  
猶戀母化爲胡蝶未忘親非關覓筍衣間淚不  
爲求魚水畔身千里孤墳五更雨九原腸斷畏  
雷人



彭城

自古三軍地於今荆棘生山留漢雲氣岸束禹  
濤聲雨壞神仙宅花藏帝子城不知彭祖壽幾  
度見河清

過呂梁走筆呈董復生

奔濤疾如一枝箭飛擢輕於千里馬丹嶂翻從  
波底開黃河直自雲中下顧我徒爲擊揖來看  
君真是濟川才已知涉險由天也何用臨流歎  
水哉

舟中逢北來客聞龍使君新拜太守意疑

未是蜀郡

客裏聞君佩虎符幾時五馬別三吳欲將書劔  
依嚴武真作西川太守無

下邳夜泊雨甚童子持盤罌盛水床頭亂  
鳴戲示此作

黃石城頭雨不乾千聲瀉入水精盤依稀錯聽  
蓮花漏滴破青山夢不完

雨中渡黃河作軍中樂因成放歌行留別

朱君在明

白門城中五更雨黃石橋邊一尺水青雀樓船



飛上天濁浪速於金鏃矢羣魚以目聽人語大  
者小者俱無耳山川如此意快甚擊碎唾壺心  
未已漁陽淵淵三五搗羌女之管胡兒笳請彈  
鬱輪袍自抱大絃小絃之琵琶鏡歌金奏塞下  
樂長淮之波沸如麻會稽賣薪東陵種瓜昨日  
富貴不能保今朝貧賤不足嗟任君呼牛呼馬  
爲龍爲蛇崑崙山星宿海鄒元水經徒爾爲張  
騫河源竟安在休問三山與十洲誰能百年更  
千載朱季從來意氣多躊躇欲別奈君何我有  
合歡桃花扇又有雙飛蛺蝶羅請君贈我嬌青

娥以羅裁袖舞以扇障面歌自古何曾有再黑  
之白髮亦未有重上天之黃河西山斜日不可  
以繩繫世間安得魯陽戈今日下邳明日淮陰  
丈夫長懷一片心張良乃進老人履韓信還投  
漂母金我歌放歌英雄陸沉

奉寄太師成國朱公二十八韻

先帝垂衣久元公翼戴長宵廬明月殿曉衛白  
雲房賜馬行長樂看花宿未央常陪五時祀獨  
奉萬年觴出入鈞陳側馳驅太乙傍幾株温室  
樹廿載御爐香不離芙蓉苑頻經蕙草芳列營



分虎旅對 陛和龍章劔履還家澁頭鬚下直  
蒼佩圖朝 少主讀策感 今皇舊抱弓如月  
重添戟是霜首先迎玉輅身自掃明堂金匱山  
河誓丹青日月光太師姜呂望尚父郭汾陽爵  
已無前列班惟有末行豈徒居紫闥兼以業青  
箱虞令稱書監穰侯號智囊十經歸甲乙百氏  
屬低昂僕本蓬蒿士蕭然薜荔裳上書三寸舌  
下第九迴腸鸚鵡為時忌蛟龍且自藏人嗔杜  
甫傲公許禰衡狂惜別歌楊柳臨岐贈鷓鴣星  
辰從此隔雲漢永相望魚腹何迢遍鴻飛亦渺

茫渡淮尋漂母入楚問韓王裘重蘇秦辱金空  
陸賈裝不知麟閣上可更憶滄浪

清口驛阻雨

小驛官無馬扁舟客有星淮南芳草色望見隔  
河青

漂母廟寄顧朗生

去歲渡淮客先歸空斷菟不同尋漂母獨自憶  
王孫積雨壞遺像無金修廟門與君俱勝下惟  
悴不須論

寶應舟中卧病逢張將軍北上



扁舟南發去匆匆此地同君握手逢  
弓影半韜湖上月劍鋒真佩水中龍  
雲帆蔽日三千艘香稻如山十萬鍾  
聞說幕中堪草檄陳琳多病不能從

寄李舍人兼呈少傅相公

啼馱聲中出薊門今朝猶滯海邊村  
可憐池上薇花客不共林間竹葉尊  
燕市未能收駿馬楚人安得識王孫  
因君願上姬公頌深愧階前吐哺恩

病中過高郵李鴻臚見訪

艤棹相逢暮雨寒風流典客漢郎官  
黑頭丞相爲同氣白面書生與結歡  
病久已無花在筆家貧聊以竹爲冠  
看君真是婁公弟面上從他唾自乾

露筋烈女祠

綠水浮朱棟山門傍柳絲不將身入幕  
空有骨爲祠燕子精靈化芙蓉廟貌疑  
至今蚊與蚋還似露筋時

邵伯驛

傳舍門前邵伯湖停舟懷古意躊躇  
不知臨水



千年樹可有甘棠一二株

維揚阻雨

五月迷樓雨紛紛阻客程地厚王氣盡水綠美  
人生隋柳黃金樹揚州白鶴城六龍隨帝子何  
處錦帆行

臥病過江都歐博士見貽太山記因贈

扁舟臥病廣陵城折簡深煩地主迎應劭記言  
封禪事馬遷書敘遠遊情齋題首荀詩空寄酒  
壓桄榔醉不成珍重投珠賢博士天涯能念舊  
王生

渡江寄吳氏伯仲

烟中流水曉潺潺揚子津頭雨一灣沾袖成斑  
皆客淚隔江如黛是家山欲探子母羞錢篋未  
卜雌雄泣劍環寄語吳郎三玉樹莫因裘敝笑  
人還

雨中姜司成邀遊焦山二首

病渴愛潮聲來陪畫舫行雨從江上至雲在寺  
中生絳帳容禪侶青衿入化城寄言焦處士莫  
避大司成

雨裏暮山寒同僧坐急湍如何貝葉藏亦有杏



花壇法借降龍問銘尋瘞鶴看爲貪禪悅味強  
病一加食

焦隱士祠

荒祠佛殿傍俎豆漢焦光黃屋再三詔青蓮一  
十房祭田從縣令社酒屬漁郎未許嚴陵並因  
嫌上御床

三詔洞

洞口竹森森渾疑隱未深江流堪洗耳山色似  
焚林丹詔去已久白雲留至今只應鷗與鷺猶  
有避人心

吸江亭

萬里清江色一杯如可吞楚雲浮法座海日挂  
山門禹蹟黃龍去胥潮白馬喧坐聞高臥者千  
載道彌尊

京口夜泊江水汎濫壞客舟問訊朱君

水以江爲壑客將舟當家輕撓漂一葉急浪闔  
千花謾道城如甕真看渚是瓜因星知使者青  
雀艤前沙

會景堂七詠

懷墨池



臨池人不見惆悵白鵝羣  
蠕蠕數科斗依稀類  
古文

卓筆峰

一枝翠微色插地若書空  
試問生花否青山入  
夢中

海虬壑

鐵網枯珊瑚半朽臥蒼峽  
風吹虬柯枝簌簌動  
鱗甲

雲芝巖

煌煌赤靈芝九節生巖下  
采采金盤中持之獻

王者

來鳳徑

蔣生三徑裏琅玕萬箇齊  
實爲鳳凰食枝待鳳  
凰棲

影龍橋

魚梁下山照驪龍浮出水  
誰驚明珠影橋上尚  
書履

明碧洞

空明碧玉洞鑿成非避秦  
如何桃花樹亦自解  
迷人



過秦汝立小聽松因寄童子鳴  
逆旅無人薦子虛歸來依舊病相如長安花月  
齊諧記姑蔑山川越絕書莫倚閉門高五馬須  
憑折簡寄雙魚故人情重遙相憶共聽松風歎  
索居

隆慶庚午仲夏

靖江朱宅快閣雕本

青雀集卷之上

青雀集卷之下

傳

徐先生傳

太原王穉登撰

徐先生甚愛王生言每一篇成未嘗不烏烏太  
息也於是王生愧其意許為立傳又自顧淪落  
放棄無足重先生已臨文復罷去先生請不已  
王生益慚不能勝後三年過平原感東方生詼  
諧之事遂附會成之徐先生名秉庸字常父晉  
陵梁溪人或云偃王後偃王雲仍多居江南其



祠廟祖臘祭祀所在不絕先生代業儒父亦經  
生家貧先生出贅烏氏烏卽王故姓婦翁善賈  
先生從爲賈人事已聞王家郎讀書多致經術  
師講誦先生自外舍來竊聽悉了了乃復還舊  
業習爲博士家言焚膏不繼出坐樓楯間隨月  
東西讀之月旣落猶伊吾不輟以爲常未幾應  
有司試高等適病瘵盡舉其業棄之曰是安  
足傷吾生以其餘教授弟子往往有爲孝廉茂  
才者先生善浮沉無老生瑣尾氣所從游薦紳  
大夫酒人博徒徹侯將軍皆無間諸生奉束修

或歲時贈金錢爲壽散之平康人家略盡爲人  
短軀鬚眉如脫性喜方伎能爲風角鳥占及神  
仙起居法試之良驗又好吟詩與好山水聞洞  
庭多靈蹟渡太湖三萬頃教授其中前後十七  
年乃歸洞庭人雖居翠微比比治猥事不知有  
丘壑在籬壁間先生日課誦已卽命主床頭一  
斗酒出坐湖濱口啞啞吟不休稍解似主人又  
漸洽無不願爲徐先生游於是洞庭人始有好  
事者王家子弟甚衆一一得其心而尤最愛穉  
登稱譽過當穉登小時慧人或信先生言比老



大碌碌爲世擲揄不堪先生獨持其說無所撓  
猶喑喑稱王生不去口實王生去歲射策京師  
復下第會姻戚兒暴成名中外宗黨羣趨之家  
人皆羞王生不致一札先生自千里外時時寄  
書益盛述王生奇士使堅樹立勿爲輕售當是  
時王生從史官校書成頗有薦者可覬得一官  
因感徐先生之言乃棄歸

王穉登曰太史公言蘇季子貧時着黑貂還家  
嫂織自若妻子不爲舉炊誠惻然傷之疑其議  
論過激無是事也以今度之想當然耶徐先生  
人耳

### 墓表

#### 顧大有先生墓表

有吳徵士曰顧先生以嘉靖乙丑卒丙寅葬後  
四載爲隆慶戊辰其忘年生王穉登北歸始爲  
文表其墓曰先生姓顧氏名元慶字大有吳之  
長洲人家陽山大石下學者稱之曰大石先生  
顧爲郡族姓由晉元公以來不知凡幾葉子孫



皆居埭川至先生父某出贅陽山李氏李業故  
饒無他丈夫子悉舉家財歸其壻逮先生時猶  
藉外家貲得以無匱數從諸先生游肆力學問  
少傅王公時爲史官載酒游大石先生暎竹間  
窺之少傅公見先生濯濯姣也召使前試其所  
爲文甚美遂以女弟妻焉是時王公方通顯吳  
中富人兒無不願委禽其妹焉者乃遽歸一經  
生先生亦善自晦若未爲王家女壻時於是人  
並高之比壯好學不怠三墳之篇九丘之策無  
不覽觀屬文綴辭言必弘雅而性尤好客客至

親爲汛掃堂舍時時擊鮮治具毋敢溷所以慰  
藉之良厚又善延譽後進借其羽毛以故人人  
自喜皆以爲得顧先生陽山在塢壁中傍舍多  
田家子代習爲農人事見先生佔俾狀初恠且  
笑先生乃輒與談稼穡沾沾不休其孳廢業者  
勞苦之陽山人後更愛近先生山間舊無冠蓋  
客自先生來居凡有大人長者或諸侯游士樓  
船鏡歌怒馬屏泥麻涕填咽里中皆驚及走視  
之無不造顧先生家山人竊慕豔以爲榮始有  
好學者書聲殷殷起隴間矣先生由此名益重



四方之人無不想望風采往往從吳人客游者  
問起居前太守溫公雅聞先生賢下記屬縣曰  
夫鄉飲酒禮所以老老貴德表世維風也而間  
者黑白混淆淑慝不分比之匪人太守是愧徵  
士顧元慶孝弟力田黃髮樂道朴茂明信清亮  
自然韞匱多藏博物君子鄉評月旦允稱耆舊  
記到其辟至賓位以稱陛下尚齒尊賢至意先  
生不拂其情爲一起大冠危裾襞積緩帶駕下  
澤乘欵段前入學宮與校官祭酒弟子諸生几  
杖醕爵備三老之典肅肅如也雍雍如也一時

觀聽者稱爲得人先生預卜墓於大石之麓茂  
松清泉包帶荒野日與客琴酒游其中風流曠  
達無減於種白楊製挽歌者又每戒其子孫毋  
厚葬棺僅庇骸椁可容棺蓋棺掩土不擇時日  
朱畫玉匣黃腸秘器身之贅疣也楊王孫裸葬  
庶幾速朽哉先生以成化某年月日生嘉靖某  
年月日卒春秋七十九所著簷曝偶談一卷夷  
白齋詩話一卷紫府奇玄四卷雲樹新編三卷  
瘞鶴銘考一卷雲林遺事一卷消暑珠一卷大  
石八景記一卷文章詩賦碑銘誄序若干篇次



第行於世子五人某某早卒議傳其業謾傳其  
丹青惟著述無傳焉嗚呼古之英彥淪謝鴻碩  
云逝則必有式墓門表封樹置守冢禁樵蘇者  
皆所以激厲頹俗風美人倫流傳典刑輔翊教  
化也後之君子過其墓思其人其將有感乎余  
言矣夫

誄

吳太僕誄

并序

太僕少卿晉陵吳公以隆慶元年十一月十七  
日卒嗚呼哀哉公仕爲列卿貴矣黃髮令終壽

矣良田美宅富矣抗章攫鱗直矣三鷓鳳毛旣  
有子矣河渠之功刻名金策垂不朽矣造物者  
畀公厚矣善矣可無憾矣公胡蓋棺目不瞑也  
惟余小子知公肝腸流涕作誄系之素旂嗚呼  
哀哉誄曰

讓王逃荆黃屋恐污至德化夷爰開姬吳公子  
挂劍亦避其都延陵片石綠字嗚呼瓜瓞綿只  
椒聊遠且異流同源異幹同株卓哉黃梅奮跡  
賢良鶴書玄纁乃辟星郎魯恭中牟潘岳河陽  
花開縣裏雉離車傍温温循吏厥後宜昌謂天



百自增

蓋高而聽則卑如彼斟酌或報或施不在其身  
豈曰吝斯于公陰德有子嗣之其嗣維何伊吾  
夜聲雪案冬白螢囊夏青李架萬軸劉笥一經  
擢相朱邸誨導東平子既續父孫亦述祖匪伊  
他人公繩厥武出縮黃綬入衣繡斧驄行紫陌  
霜下烏府大俠鬼震豪宗色沮虎臣馮陵梁冀  
跋扈白簡朝入膽落寸疏巖巖尹氏醜讒釀妬  
公折其萌逢彼之怒謙恭者莽先隱後露孰爲  
首功徙薪借喻惠河如線半流半塞輪載蹄輓  
任梗負澁輸將皇皇天子前席道傍築舍羣議

不力公云鑿渠省費什伯謀事在人臣任其責  
朝沿夕洄面黑頭蒼太液涓涓流澌濫觴前人  
舊蹟千載茫茫石樞草埋水門沙藏剔其青泥  
決其污潢其堰其礎以隄以防爲埽爲牖曰津  
曰梁車若殷雷畚如堵墻甃基以石衛址以楊  
清波魚鱗以施帆檣香杭如山達於敖倉帝命  
台輔駕言出遊魚龍曼衍鷓鴣泳游依依者木  
湯湯者流天文陸離光芒射眸縹首朱目烏絲  
銀鈎嗟嗟利國不利羣下鼠雀罔耗侵漁莫假  
節費公室騰謗私舍青蠅不仁誰作俑者禮義



不謬言何恤也五疋驂騮一一桃花剖竹東郡  
上冢還家立陞胡喜守土何嗟不緇連城愈銛  
鎖鄒瓠子微勞勒爲成書請回明燭照此區區  
乙夜開卷玉几躊躇請付史官度之石渠胡床  
挂壁薇省遷居紉蘭成佩畫熊作輿楚氓臥轍  
寇君不復白下駒駟金陵首著飛龍孳息汗血  
蕃育圉人奚官花間綺服非子毛仲勉旃芻牧  
萊衣尚斑潘髻猶綠挂冠脫組吳門梅福陶朱  
魚陂馬援羊林橘柚萬戶竹箭千金菑畚新田  
阡陌相尋公超之市柴麻晝陰儉存苦節富謝

驕心兒齒童顏歲星浮沉葛子升越筒中女布  
輕吹方空冰縠紈素公豈無衣促裾綈絮諸子  
繡鬢明月琥珀釵雀笄鳳石山隱飾樂我綦巾  
安用粉澤鮮車怒馬丹轂屏泥曾不是御逍遙  
杖藜篔簹款段山遨谷嬉畫脂鏤冰萬錢一盤  
芍藥調醬彫胡治食公飯脫粟旣旨且甘蘭棗  
桂棟椒壁錦柱下爲山林上爲雲氣公栖衡門  
楊柳五樹嗚呼財爲怨府口實禍鼓不畏辛螫  
曷免蠆蜂不畏溪壑曷虞射工探殼毀巢黃口  
孤筰嚴棘交柯羅織百重水觸網罟陸犯罟罟



樾捕逮鳥淵搜及龍淹恚崩城滯憤化虹蹊田  
奪牛傷哉不弘墻高基下十手所攻白首茹荼  
鬱鬱長終嗚呼哀哉十世之宥八議之科公罪  
則鮮公勞則多死灰不然覆盆奈何淺土暴骸  
引領恩波黃腸未賜題湊未卜翁仲虛無華表  
寂寞幽幽青山悵矣白鶴門人云亾故吏淪落  
誰明 國是寃乎太僕嗚呼哀哉

疏

建造顧徵君祠堂疏

伏見故徵君顧大有先生虎頭芳裔鶴髮潛夫

南山北山一丘一壑博識類東方朔不事漢廷  
著書如司馬遷曾探禹穴里門日圮墓木風悲  
俎豆全虛祠堂未建將遂成烏有生之號無以  
棲木居士之靈揚子玄經何忍付之醬瓿竹林  
舊侶能忘感乎酒壚昔孔北海曾爲鄭玄名鄉  
而郝嘉賓亦與戴逵買宅古人遺則今世成規  
與其創在生前孰若垂之身後何須挂芙蓉於  
墓上但請捐麩麥於舟中蓋八九茅茨免使青  
山寂寞樹一雙華表待他白鶴歸來作亭圖孟  
襄陽之容買絲繡趙平原之像造九品蓮花法



藏尚有檀那成五株楊柳神祠豈無義士誰是  
蔡郎琴畔客略助床頭之金無非桓氏笛中人  
少發庭前之廩謹疏

書

與李司徒伯仲書

入舟飽食坐船牕間殊無事比在京師騎馬黃  
塵中持策與客憫勞時似稍閒暇漫吟兩篇投  
贈伯仲亦平平無所高論皆嚼蠅之語耳董先  
生頭顱斑斑尚持蒯緱不肯還家今復着短後  
衣馳驅戰地邊風如刀當益其龍鍾也頃聞江

東多歲稻稌價賤金昌煮酒色如涼州葡萄十  
錢足沽一斗計畫青山三尺可易醉飽爛熯何  
故踈踈走逐人作牛後客耶僕與貴人交皆瑣  
尾了不可人意惟二君落落無世情故托從事  
脂車促其歸不然僕歸作移文待之矣高麗王  
家刻何晏易幸覓一部寄齋頭

與范光祿于公書

匆匆出長安門不能復詣公別恐益其黯然耳  
十一日暮泊天津驛門望見海中殘霞光明照  
數十里似織女杼軸間物欲乘風破浪過其處



盡數天田白榆歸入君平肆中卜客星何時犯  
牛斗令世間兒啞然驚亦足拊掌而朱季逐逐  
貴游不肯去坐使支機石入他人手中甚可恨  
謝光祿最能詩借吟一章嘲之

與邢德州書

征憶出都門馬玄黃過不及前坐歎彌日計與  
君侯爲別不遠折下柳絲擲道傍不復相寄今  
已趁朱君樓船下江南孝廉隨乘傳使者行可  
謂蠅附驥尾濟南多經生談鋒如雲僕且以三  
寸舌待之槐里令平時名未籍甚一旦折五鹿  
充宗之角滿座皆驚他日亦須令君侯失聲而  
歎舟中作一詩相投且未即上俟毛生不爲通  
便長歌此章排闥入矣

謝邢使君書

芳筵爛熳杯斝紛錯疊鼓層笳金奏競發又進  
優孟叔敖之伎蕩心駘目羲和旣匿蘭膏夕焚  
清歌遏雲竹不如肉書生藿腸易以醲臄子大  
夫之意厚矣至矣地主淹留橐裝未卽發明日  
當同朱季掃蘭若黃金地以待使君五驂騶穉  
登再拜



與王武定書

五馬還部羣公供帳都門車騎如堵牆僕手中  
但有一枝燕臺柳愧不能前非忘之也歸過德  
州爲德州君脫其帆不得去又醉僕以麩葉不  
能拂其拳拳更兩日始行坐上乃無武定君令  
人怱怱不成歡讀濟南圖經知海豐爲使君附  
庸邑邑丞陸君吳郡人僕內家丈人行素愛僕  
爲人潔廉忠信寬然長者其先人嘗剖竹爲郡  
稱清白吏諸郎皆貧無以爲家陸君少明經數  
射策不利既又佩橐鞬從樓船將軍出海有繫

夜郎王志爲倖臣文華沒其功不上今頭髮白  
甚益貧匱無種五株楊柳地強作負弩卑官如  
鷄肋不能舍意誠念之因邢侯薦於使君幸稍  
拂拭使得展其四體勿謂許丞龍鍾遽弃髦棄  
之也

奉陸海豐尊丈書

春中接家報遍至公書承記憶不忘又謬加譽  
於不肖皆非不肖所有公漫然粉飾之耳楊中  
丞詩篇篇明月乃以魚目投之當笑秦無人矣  
別兩載不肖且二毛公頭顱可知也廉吏月奉



五斗數口不免枵腹奈何過德州作書薦公於  
王武定托德州君附益之前到濟寧復當口授  
李觀察二君皆不肖故人稍得爲公地然恐下  
第生言不足重徒拮据也五月盡黑貂可還家  
見婦翁便道公書中言聞其家益窶茅茨屬他  
人侍兒又死今方寄食於沈郎家老孝廉夫妻  
煢煢然念之短氣

寄大司成姜公書

朱君借傳符行樓船如天上餽糧糗糒所至不  
乏僕亦竊幸飽食高枕其間徼公之靈河潤九  
里與公別未踰旬日心忡忡如隔歲何祭酒先  
生能令人念若此哉郵程徐徐不過吉行五十  
有餘力必徘徊待公未嘗敢窮日也十八日到  
廣川不卽解維夜望天河客星尚隔數舍廿三  
日復紆遲東行留書托邢侯奉報前入濟南魯  
酒香如鬱金口垂涎不能已先登太白樓待公  
來解金龜換一石醉我矣

與顧君錫書

別漸經月悠悠我思君錫足下胸間亦尚有王  
生否哉濟川湯湯一水二流東流僕與之俱歸



其西上者猶及寄夢寃於足下也舟所過凡有高樓垂柳啼鶯處輒思與武陵生銜杯其間生今躍馬黃塵何時暇耶

與趙將軍書

聽賢將軍談兵若聚米爲山谷虜皆在目中矣黃金鵲印君家物君還自取之可豈令他人兒竊入腰間哉僕輩得爲朱公屋上烏故賢將軍推所以愛朱公者愛僕僕戴之愧之雖然不敢忘朱公也有一書托戲下爲轉投乞載之橐中他日過任城君已建大將旗鼓出玉門關不當

復在濟上握手當是時如呼韓邪款塞無所用僕不然欲勒燕然銘請礮石待王先生不敢讓

答朱太傅書

初十日寄書後見趙將軍得拜公書讀之灑濯黃翁言譎甚不足憑須歸商之帖乃爲他人獲鹿可惜已趙將軍籌邊有封狼居胥志又能爲太傅公留客其爲旅人積糒設次所以慰藉之良厚然非公卽白面生安所得此於趙君故敢占數言謝公不特感趙君已也

與喬比部書



不聞鷄舌之氣且半載無時不有喬公在臆間也今着黑裘渡淮而市中兒欲以胯下困我乃遂不敢謁使君雖然僕且病消顏狀枯悴頗似屈大夫江潭時卽欲行亦仆不能前王先生雖懦豈畏淮陰少年哉舟中望見擊絮媪祠在城闔瓦屋三間極庠暗無復杜鵑山木處廟貌煦煦猶有哀王孫意僕無床頭金俟病解當吟一篇投之僕所善者張萬戶元凱舊在都下時嘗對使君述其人大略張故儒將有國士門風其腹中書可當十萬水犀甲比聞督餉未至尚屯

江孺早晚將負弩上謁乞一言薦之開府公幕  
有下如此裨將軍勿作貫魚待之也

與邵戶部書

往聞蠻中客言日南山水如綉甲於中土以爲厥產水銀黃金象齒大貝名花異鳥與芙蓉之砂錯金之鏤如是足矣乃不知有公等大雅之士甚悔舊視日南小也不奉含香之論又五十五日滹沱宴笑未曾去心廿四日渡淮遇張將軍餘艤托致尺牘張博物洽聞可令經生北面部使者輕萬戶侯如弁髦然幸不惜口吻吹噓之



拙詩爲公吟成雖醜不敢匿也

與熊戶曹書

舟中讀熊先生上 皇帝書有賈生慟哭意非尋常畫省郎也楚多深山大澤公其龍虺哉別後成一篇奉投莫可得致五月廿四日遇張將軍於淮南附此扎在其劒削中張君名將種五車六韜文武並用其才視僕故當十倍曹丕僕敬問熊先生足下如欲用會稽之竹箭則請從此君箝而羽之

與李司徒伯仲書

五月廿四日渡淮江南黃梅雨連日夜不解舟中上漏下濕蒯緱皆糜爛欲火交熾識浪不停如是一切衆生漂沒大苦海間安得兩李居士舌上青蓮花度入甘露門哉僕所托寄書者張都尉其人恂恂腹中乃武庫也一佩橐鞬文法吏徃徃以刀筆束縛之邯鄲才人嫁爲廝養卒婦古今有情者皆爲拊膺二公顧豈能獨障面而過

與王職方書

他人居畫省者不過僅咀鷄舌使君口中獨有



千重翠微此豈今世紛紛青紫之士哉不從朱  
鴻臚遊何得交使君蓋深賞魏無知矣僕敬薦  
一士於門下其人爲張將軍元凱讀書有俊才  
忠信廉潔貪泉不飲向爲王中丞檄造樓船千  
艘未嘗以脂膏自潤今督浙西征輸乃自鬻寶  
刀治橐中裝此可保其往矣飛黃服鹽車衆  
亦皆扼腕况伯樂善相馬者哉

與李舍人書

舟中兩見哉生鳧猶未得到家驥尾自不遲當  
由附者累之五月廿四日過高郵承鴻臚公停

軾見顧僕病不能偕之入林見阮嗣宗輒懷仲  
容不能已鴻臚公如明泉惠風交者心快琳琅  
珠玉盡在李家矣僕向爲袁公弟子故當世所  
以彈射之者甚力惟君家相公獨無所嫌真休  
休有容者也逢掖生得皇甫君一顧便氣吞雁  
門太守僕誠刻之五內不徒在舌間耳還家別  
布一函乞君過庭時預達之

與王元美書

淮南逢周君得承王先生休問甚善鄉人客都  
下還者搆僕兩人謂僕持之急又或從貴人坐



上詆爲吳中盜魁此僅足資軒渠而周君意極  
快快可謂不知僕者灌將軍使氣凌人欲罵則  
罵何至作舍沙射工哉平生良惡背憎何故躬  
自蹈之僕縱化爲異類亦須爲猿鶴弗爲蟲沙  
也鬱輪袍果無人問君言遂詛我耶

與王敬美書

征幘望都門復去不及致書意惘惘見德州太  
守瀾翻諱公詩并其口亦香矣長鋏將還家聞  
君未卽入秣陵且圖共醉竹林中異時僕從秦  
淮酒家姬飲南宮郎在馬上惟有垂涎執搨而  
歎吳邵武客燕山又誦其詩故可人欲一識其  
面乃托疾召王生生止不前吳知漢大者不應  
亦有尉他心也君或見之請問其養病傲士者  
何故

與歐楨伯博士書

青雀行遲不如揚州鶴快恨寡腰纏不能買一  
隻騎還也病消不可解卽有勾漏砂漢仙掌盤  
中露與壺公一丸丹皆不及歐公半晌談能已  
病安得致之見人家酒食僮奴便思君李記室  
比復何如余君雙鳧幾時過廣陵僕曾投書寄



足下不到石頭城定不浮沉矣

與朱在充書

南歸渡揚子汲江波一百斛盡濯去衣間洛陽塵快甚望靖江孤山如美人一痕眉知是朱公種魚處心已馳於彼矣且當先還見蘇秦小妻不能遽乘長編相尋也兩使乎幾時及家曾將僕書否章臺柳已入沙叱利手中僕輩聞之亦失箸足下尚未有消息耶

與朱在問書

濟上遇鴻臚家長髯得承足下舟中眠食甚安

計此時到家幾一月倚杖門前看江上夕陽山何如闕下馬頭塵足下善自慰勿多下卞和淚也僕行李太單買搗衣石一片壓船頭雖無鬱林五馬此石不愧稱廉矣書劔何時到虎丘寺當報我令沙彌掃香閣相待

與馬鴻臚書

劉更生作郎十年未得調君將無似之才士轅軻豈獨一馬鴻臚哉舟中讀公詩如一條清冰在手中無復有炎赫氣古人稱消暑珠當即是此神物不然出龍頷蚌腹間者但聞照車數十



乘安得生如此清風舍人見主人翁客如見主人翁令客愧不能當伯玉使人至仲尼家命坐卽坐猶喑喑歎其爲賢以今觀之言退三舍避去

與吳中丞書

異時明公作畫眉京兆穉登猶得以游士借階前地捫虱下議今日大中丞開府江上黃鉞朱鉞組練如雪卽欲投謁轅門而軍中部曲督候司馬祭酒之屬譙呵譏察過者股慄青衿生懷中三指刺何所自致於旂鼓下哉明公雖未忘平生交亦且辟易而去不敢遽犯斧鑕也

與姜司成書

裘間京洛塵簌簌滿身未能謁焦先生恐此君挪揄人且須還家易青荷葉衣將船載醇酎數十石散髮讀離騷經作楚臣羌此聲渡江令水中龍負舫以角而聽焦誠高士能不躩然逐我此時恨無姜公几杖當採芙蓉十束奉寄不肖平時負氣傲誕不能容齟齬生輒坐百尺樓上出白眼光待之屢受世人睚眦不爲改見姜公伯仲敦厚弘雅若渾金璞玉而其郎君亦朴茂



清儉有石內史執搗數馬尾意十年野狐禪一  
夕汗下矣

謝姜司成書

大司成着錦衣還家二千石以下皆除地郊勞  
盡舍去不顧獨載酒涉江二十里與王生飲無  
論盛饌不勝於東隣殺牛已乎水軍艦中熱如  
伏甑公夜來眠食何如念之念之纔欹枕夢石  
上老人顏貌類雲中君意傲甚指僕謂江東有  
依人鳥鵲是耶愧且醒疑爲焦慮士汗淫淫下  
不休悔不固謝姜先生招而令此翁得嗤我

與黃吉甫書

傳聞足下罪狀得從未減律白粲耶鬼薪耶城  
旦春耶司寇作耶嗟乎黃生机上之肉任人割  
耳奈何足下政如蝦蟆陵下佳人已嫁爲商人  
妻不肯低眉事商人安得免笞榜哉陶朱公累  
致千金亦累散之故不及禍足下何獨不能乃  
沾沾學賈胡剖腹藏明月乎請速投之淵中勿  
更貽悔還家稍息肩欲與足下爲河朔飲脫衣  
看身上癢痕先語足下相見時勿作楚囚泣聲  
使高漸離輩傍睨而笑



與唐玄卿書

足下何時還家耶有一第差勝僕堪令細君炊  
矣吾家姬不肯學蘇秦妻獰顧益持炭屢伏雌  
遣奴勞郎郎深愧之也僕自病不能見故人非  
謂故人慢僕僕未嘗不出毘陵諸君跨下然聞  
其射影不休足下三寸舌尚在不為僕解紛何  
所稱魯連先生哉不如爛去

奉陸先生書

河汾先生上隋皇帝書雖不召而其門生房杜  
輩皆得以師說相天下可謂未喪斯文吾師既

頃趨東歸老門人亦別其足咄哉絳帳無色矣  
師抵家計可及櫻桃穉登四月初三日下滹沱  
已兩易弦望尚未達吳門舟中載愁數百石行  
故迂緩如此然猶得食楊梅無傷遲也經筭在  
船牕魚龍往往挾舷睥睨今送納遽無光恠矣  
與陳觀察先生書

洪都太守幾時離家想不及扇枕王生八行書  
布之庭下否不見觀察公一載風流定不減前  
度公莫問馬卿卿病甚不似狗監薦子虛時也  
園中青琅玕為洗三百箇俟僕良愈當題詩一



一滿其上

隆慶庚午仲夏

靖江朱宅快閣雕本

青雀集卷之下





